

北

史

15

一

海山先生集

百衲本二十四史

# 北史

四部叢刊史部

上海涵芬樓影印  
北平圖書館及自  
藏元大德刻本原  
書版匡高二十二  
公分寬十七公分

北史目錄

凡一百卷

本紀一十二卷

列傳八十八卷

魏本紀第一

北史一

魏本紀第二

北史二

魏本紀第三

北史三

魏本紀第四

北史四

魏本紀第五

北史五

齊本紀上第六

北史六

齊本紀中第七

北史七

齊本紀下第八

北史八

周本紀上第九

北史九

周本紀下第十

北史十

隋本紀上第十一

北史十一

隋本紀下第十二

北史十二

列傳第一

北史十三

后妃上

魏神元皇后竇氏

文帝皇后封氏

桓皇后惟氏

平文皇后王氏

昭成皇后慕容氏

獻明皇后賀氏

道武皇后慕容氏

道武宣穆皇后劉氏

明元昭哀皇后姚氏

明元密皇后杜氏

太武皇后赫連氏

太武敬哀皇后賀氏

景穆恭皇后郁久闍氏

文成文明皇后馮氏

文成元皇后李氏

獻文思皇后李氏

孝文貞皇后林氏

孝文廢皇后馮氏

孝文幽皇后馮氏

孝文昭皇后高氏

宣武順皇后于氏

宣武皇后高氏

宣武靈皇后胡氏

孝明皇后胡氏

孝武皇后高氏

文帝文皇后乙弗氏

文帝悼皇后郁久閭氏廢帝皇后宇文氏

恭帝皇氏若干氏

孝靜皇后高氏

列傳第二

北史十四

后妃下

齊武明皇后婁氏

蠕蠕公主郁久閭氏

彭城太妃尔朱氏

尔朱氏

上黨太妃韓氏

馮翊太妃鄭氏

高陽太妃游氏

馮娘李娘

文襄敬皇后元氏

琅邪公主

文宣皇后李氏

段昭儀王嬪薛嬪

孝昭皇后元氏

武成皇后胡氏

弘德李夫人

後主皇后斛律氏

後主皇后胡氏

後主皇后穆氏

馮淑妃

周文皇后元氏

文宣皇后叱奴氏

孝閔皇后獨孤氏

明皇后獨孤氏

武皇后阿史那氏

武皇后李氏

宣皇后楊氏

宣皇后朱氏

宣皇后陳氏

宣皇后元氏

宣皇后尉遲氏

靜皇后司馬氏

隋文獻皇后獨孤氏

宣華夫人陳氏

容華夫人蔡氏



北史目錄  
三  
煬愍皇后蕭氏

列傳第三

北史十五

魏諸宗室

上谷公統羅

建德公嬰文  
貞定侯陸

武陸侯因

長樂王壽樂

望都公頽

曲陽侯素延

順陽公郁  
宜都王目辰

六修

吉陽男比干

江夏公  
高涼王孤  
西江公敷  
司徒石

武衛將軍謂

淮陵侯大頭  
河間公齊  
扶風公處真  
文安公泥

寔君

秦王翰

常山王遵

五世孫可

陳留王虔

五世孫暉

毗陵王順

遼西公意烈

窟咄

列傳第四

北史十六

道武七王

明元六王

太武五王

列傳第五

北史十七

景穆十二王上

列傳第六

北史十八

景穆十二王下

列傳第七

北史十九

文成五王

獻文六王

孝文六王

列傳第八

北史二十

衛操

莫舍

劉庫仁

弟子羅辰  
羅辰曾孫仁之

尉古真

從玄孫瑾

穆崇

奚斤

叔孫建

安同

庾業延

王建

羅結

婁伏連

曾孫寶

閭大肥

奚牧

和跋

莫題

賀狄干

李栗

奚眷

列傳第九

北史二十一

燕鳳

許謙

崔宏

子浩

張袞

弟恂

鄧彥海

列傳第十

北史二十二

長孫嵩

五世孫儉  
儉子平

長孫道生

玄孫幼况  
从弟紹遠  
紹遠子覽  
兄子熾  
熾弟晟

長孫肥

列傳第十一

北史二十三

于栗磾

孫勁六世孫謹謹子寔寔子顗仲文寔弟翼

翼子爾王翼弟義義子宣道宣敏

列傳第十二

北史二十四

崔逞

子願孫或玄孫罔休五世孫倭六世孫贈

王憲

曾孫昕聯

封懿

族曾孫回回子隆之回弟肅回族弟述

列傳第十三

北史二十五

古弼

張黎

劉潔

丘堆

娥清

伊馥

乙瓌

周幾

豆代田

車伊洛

王洛兒

車路頭

盧魯元

陳建

來大千

宿石

萬安國

周觀

尉撥

陸真

呂洛拔

薛彪子

子叔

尉元

慕容白曜

和其奴

苟頽

宇文福

列傳第十四

北史二十六

宋隱

從子愔 愔孫弁 弁孫欽道 弁孫弟翻

許彥

從子愔 愔孫弁 弁孫欽道 弁孫弟翻

刀廕

子遵 曾孫冲

辛紹先

韋閼

孫察

杜銓

列傳第十五

北史二十七

丞遵

張蒲

谷渾

曾孫楷

公孫表

張濟

李先

賈彝

竇瑾

李訢

韓延之

袁式

毛脩之

嚴接  
朱脩之

唐和

寇讚

孫雋

酈範

子道元

韓秀

堯暄

孫雄

柳崇

列傳第十六

北史二十八

陸俟

源賀

曾孫彪  
玄孫師  
師從叔雄

劉尼

薛提



列傳第十七

北史二十九

司馬休之

司馬楚之

曾孫裔  
司馬叔璠

司馬景之  
司馬天助

劉昶

蕭寶寅

兄子贊

蕭正表

蕭祇

蕭退

蕭泰

蕭搆

蕭圓肅

蕭大圜

列傳第十八

北史三十

盧玄

玄孫思道  
昌衡  
元明  
潛

盧柔

子愷

盧觀

弟仲宣 叔彪  
弟子文偉

盧同

子斐 兄子景裕 景裕弟辯  
光 光子貴 光從弟勇

盧誕

列傳第十九

北史三十一

高允

從祖弟祐  
昂 祐曾孫德正 祐從子乾  
季式

列傳第二十

北史三十二

崔鑒

兄孫伯謙

崔辯

孫士謙 士謙子彭  
士謙弟說 說子弘度

崔挺

子孝芬 孫宣猷 曾孫仲方  
仲方從叔昂 挺從子李舒 挺從孫暹

列傳第二十一

北史三十三

李靈

曾孫元忠 渾  
璩 曾孫德饒 弟子槃  
公緒

李順

玄孫元標

李孝伯

兄孫宏山  
謚弟子士謙

李裔

子子雄

李義深

弟幼廉

列傳第二十二

北史三十四

游雅

從祖弟明根

高閭

趙逸

兄子瑛

胡叟

胡方回

張湛

段承根

宗胡

闕駟

劉延明

趙柔

索敞

宋繇

曾孫游道

江式

列傳第二十三

北史三十五

王慧龍

玄孫松年

五世孫弘

鄭羲

孫述祖 從曾孫道邕 道邕子譯  
譯叔孫儼 儼族孫偉

列傳第二十四

北史三十六

薛辯

五世孫端 端從祖弟胡 湖子聰 聰從子潘  
通子道衡 聰弟子善 善弟慎

薛寔

薛慳

列傳第二十五

北史三十七

韓茂

皮豹子

封敕文

呂羅漢

孔伯恭

田益宗

孟表

奚康生

楊大眼

崔延伯

李叔仁

列傳第二十六

北史三十八

裴駿

從孫敬憲  
從弟安祖

莊伯

裴延雋

裴佗

子讓之  
皇甫和

孫矩

裴果

裴寬

裴俠

子祥肅

裴文舉

裴仁基

列傳第二十七

北史三十九

薛安都

劉休賓

房法壽

曾孫豹族子景伯

玄孫彥謙

畢衆敬

曾孫義雲

羊祉

子深孫肅弟子敷烈

列傳第二十八

北史四十

韓麒麟

程駿

李彪

孫昶

高道悅

甄琛

高聰

列傳第二十九

北史四十一

楊播

子侃播弟椿謚

子昱椿弟津

津子遁

楊敷

子素敷叔父賓

素弟約

約從叔昇

北史四十一

紀

列傳第三十

北史四十二

王肅

劉芳

孫歆  
芳從子繼

常爽

列傳第三十一

北史四十三

郭祚

張彝

孫晏之  
曾孫乾威

邢巒

弟子昕  
族孫臧

李崇

從弟平  
平子將大

列傳第三十二

北史四十四

崔光

子劼  
弟子鴻

崔亮

從弟光韶  
叔祖道固

列傳第三十三

北史四十五

裴叔業

夏侯道遷

李元護

席法友

王世弼

江悅之

淳于誕

沈文秀

張讜

李苗

劉藻

傅永

傅豎眼

張烈

李叔彪

路恃慶

房亮

曹世表

潘永基

朱元旭

列傳第三十四

北史四十六



孫紹

張普惠

成淹

范紹

劉桃符

鹿念

張燿

劉道斌

董紹

馮元興

列傳第三十五

北史四十七

袁翻

弟曜 曜子聿脩

陽尼

從孫固 固子休之 固從兄藻  
藻子斐 固從兄元景

賈思伯

祖瑩

子珽

列傳第三十六

北史四十八

尔朱榮

子文暢 從子兆 從弟彥伯  
彥伯子敞 彥伯弟仲遠 世隆

世承 榮從父弟度律  
榮從祖兄子天光

列傳第三十七

北史四十九

朱瑞

叱列延慶

斛斯椿

子徽 孫政

賈顯度

弟智

樊子鵠

侯深

賀拔允

弟勝 勝弟岳

侯莫陳悅

念賢

梁覽

雷紹

毛遐

弟鴻賓

乙弗朗

列傳第三十八

北史五十

辛雄

族祖琛 琛子術 術族子德源

楊機

高道穆

兄謙之

綦儁

山偉

宇文忠之

費穆

孟威

列傳第三十九

北史五十一

齊宗室諸王上

趙郡王琛

子散

清河王岳

子勸

廣平公盛

陽州公末樂

襄樂王顥國

上洛王思宗

子元海 弟思好

平秦王歸彥

兄子武興王普

長樂王靈山

神武諸子

列傳第四十

北史五十二

齊宗室諸王下

文襄諸子

文宣諸子

孝昭諸子

武成諸子

後主諸子

列傳第四十一

北史五十三

万俟普

子洛

可朱渾元

劉豐

破六韓常

金祚

劉貴

蔡雋

韓賢

尉長命

王懷

任祥

子胄

莫多婁貸文

子敬顯

庫狄廻洛

庫狄盛

張保洛

賀拔仁趨珍段琛  
康德韓建業封輔相

尉標

子相貴

范舍樂 牒舍樂

侯莫陳相

薛孤延

斛律羗率

子孝卿

張瓊

宋顯

王則

慕容紹宗

叱列平

步大汗薩

薛脩義

慕容儼

庫狄伏連

潘樂

彭樂

暴顯

皮景和

綦連猛

元景安

獨孤永業

鮮于世榮

傅伏

列傳第四十二

北史五十四

孫騰

高隆之

司馬子如

子消難 裴良深 兄子膺之

竇纂

尉景

婁昭

兄子叡

庫狄子

孫子文

韓軌

段榮

子韶 孝言

斛律金

子光 美

列傳第四十三

北史五十五

孫季

陳元康

杜弼

子臺卿

局謨

子恭懿

張纂

張亮

趙起 徐遠

張曜

王峻

王紘

敬顯儔

平鑒

唐邕

白建

元文選

趙彥深

赫連子悅

馮子琮

子慈明

郎基

子茂

列傳第四十四

北史五十六

魏收

魏長賢

魏季景

子澹

魏蘭根

族子愷

列傳第四十五

北史五十七

周宗室

邵惠公顥

子什肥

導護

杞簡公連

莒莊公洛生

虞國公仲

廣川公測

弟深  
深子孝伯



東平公神舉 弟慶

列傳第四十六

北史五十八

周室諸王

文帝十王

孝閔帝一王

明帝三王

武帝六王

宣帝二王

列傳第四十七

北史五十九

寇洛

趙貴 從祖兄善

李賢

子詢弟遠

崇

孫敏

子渾

梁禦

列傳第四十八

北史六十

李弼

曾孫密

宇文貴

子忻豈

侯莫陳崇

子穎  
崇兄順

王雄

子謙

列傳第四十九

北史六十一

王盟

子勳  
孫誼

獨孤信

子羅

竇熾

子榮定  
兄子毅

賀蘭祥

叱列伏龜

閻慶

子毗

史寧

子雄祥

權景宣

列傳第五十

北史六十二

王羆

孫長述

王思政

尉遲迥

弟綱  
綱子運

王軌

榮運

列傳第五十一

北史六十三

周惠達

馮景

蘇綽子威 從兄亮

列傳第五十二

北史六十四

韋孝寬

兄復 復子世康

韋瑱

子師

柳蚪

弟檜 檜子述

慶

機弟弘旦

肅

從子讐之

列傳第五十三

北史六十五

達奚武

若干惠

怡峯

劉亮

王德

赫連達

韓果

蔡祐

常善

辛威

庫狄昌

梁椿

梁臺

田弘

子仁恭  
孫德懋

列傳第五十四

北史六十六

王傑

王勇

宇文虬

耿豪

高琳

李和

子徹

伊婁穆

達奚寔

劉雄

侯植

李延孫

韋祐

陳欣

魏玄

泉仝

李遷哲

楊乾運

扶猛

陽雄

席固

任果

列傳第五十五

北史六十七

崔彥穆

楊纂

段永

令狐整

子熙

唐永

子瑾

柳敏

子昂

王士良

列傳第五十六

北史六十八

豆盧寧

子勣 孫毓

楊紹

子雄

王雅

子世積

韓雄

子禽

賀若敦

子弼 弟誼

列傳第五十七

北史六十九

申徽

陸通

弟逞

庫狄峙

楊荐

王慶

趙剛

子仲卿

趙昶

王悅

趙文表

元定

楊擢

列傳第五十八

北史七十

韓褒

趙肅

子軌

張軌

李彥

郭彥

梁昕

皇甫璠

子誕

辛慶之

族子昂

王子直

杜杲

呂思禮

徐招

檀翥

孟信

宗懔

劉璠子祥 凡子行本

柳遐子莊

列傳第五十九

北史七十一

隋宗室諸王

蔡景王整

滕穆王瓚

道宣王嵩

衛昭王爽

河間王弘

義城公處綱

離石太守子崇

文帝四王

煬帝三子

列傳第六十

北史七十二



高頴

牛弘

李德林

列傳第六十一

北史七十三

梁士彥

元諧

虞慶則

元胄

達奚長儒

賀婁子幹兄詮

史萬歲

劉方馮昱 王衛 陳永貴 房兆

杜彥

周搖

獨孤楷弟盛

乞伏慧

張威

和洪

陰壽

子世如  
骨儀

楊義臣

列傳第六十二

北史七十四

劉昉

柳褒

皇甫績

郭衍

張衡

楊汪

裴蘊

袁充

李雄

列傳第六十三

北史七十五

趙斐

趙芬

王韶

元巖

宇文弼

伊婁謙

李圓通

陳茂

郭榮

龐晃

李安

楊尚希

張熒

蘇孝慈

元壽

列傳第六十四

北史七十六

段文振

來護兒

樊子蓋

周羅暎

周法尚

衛玄

劉權

李景

薛世雄

列傳第六十五

北史七十七

裴政

李諤

鮑宏

高構

榮毗

陸知命

梁毗

柳彧

趙綽

杜整

列傳第六十六

北史七十八

張定和

張旡

麥鐵杖

沈光

權武

王仁恭

吐萬緒

董純

魚俱羅

王辯

陳稜

趙才

列傳第六十七

北史七十九

宇文述

雲定興  
司馬德戡

趙行樞  
裴虔通

述子化及

王世充

段達

列傳第六十八

外戚

北史八十

賀訥

姚黃眉

杜超

賀遜

閻毗

馮熙

李惠

高肇

胡國珍

從曾孫長紫

楊騰

乙弗繪

趙猛

胡長仁

隋文帝外家呂氏

列傳第六十九

儒林上

北史八十一

梁越

盧醜

張偉

梁祚

平恒

陳竒

劉獻之

張吾貴

劉蘭

孫惠蔚

族曾孫靈暉

馬子結  
靈暉子萬壽

徐遵明

董徵

李業興

子崇祖

李鉉

馮偉

張買奴

劉軌思

鮑季詳

刑峙

劉書

馬敬德

子元熙

張景仁

權會

張思伯

張彫武

郭遵

列傳第七十

儒林下

北史八十二

沈重

樊深

熊安生

樂遜

黎景熙 趙文深

龔雋

辛彥之

何妥

蕭該 包愷

房暉遠

馬光

劉焯

劉炫

褚暉

顧彪

魯世達

張冲

王孝籍

列傳第七十一

文苑

北史八十三



溫子昇

荀濟

祖鴻勳

李廣

樊遜

荀士遜

王褒

庾信

顏之推

弟之儀

虞世基

柳詵

許善心

李文博

明克讓

劉臻

諸葛穎

王貞

虞綽

王胄

兄脊

庾自直

潘徽

常德志尹式  
祖君彦孔德紹劉斌

劉善經

列傳第七十二

孝行

北史八十四

長孫慮

乞伏保

孫益德

董洛生

楊引

閻元明

吳悉達

王續生

李顯達

倉跋

張昇

王崇

郭文恭

荆可

秦族

皇甫遐

張元

王頌第類

楊慶

田翼

紐因

劉仕傳

翟普林

徐孝肅

華秋

列傳第七十三節義

北史八十五

于什門

段進

石文德

汲固

王玄威

婁提

劉渴侯

朱長生

馬八龍

文門爰

晁清

劉侯仁

石祖興

邵洪哲

王榮世

胡小彪

孫道登

李九

張安祖

王閻

郭琰

沓龍超

乙速孤佛保

李棠

杜叔毗

劉弘

游元

張須陁

楊善會

盧楚

劉子翊

堯君素

陳孝意張季珣  
杜松贊

郭世雋

卽方貴

列傳第七十四

循吏

北史八十六

張膺

路邕

閻慶胤

明亮

杜纂

竇瑗

蘇淑

張華原

孟業

蘇瓊

路去病

梁彥光

樊叔略

公孫景茂

辛公義

柳儉 郭絢 敬肅

劉曠

王伽

魏德深

列傳第七十五

酷吏

北史八十七

于洛侯

胡泥

李洪之

子神

張敖提

趙霸

崔暹

郗珍

田式

燕榮

元弘嗣

王文同

列傳第七十六

隱逸

北史八十八

眭夸

馮亮

鄭脩

崔廓子頤

徐則

張文詡

列傳第七十七 藝術上

北史八十九

晁崇

張深

殷紹

王早

耿玄

劉靈助沙門 靈遠

李順興檀特師

由吾道榮

顏惡頭

王春

信都芳

宋景業

許遵魏紹

吳遵世

趙輔和

皇甫玉

解法選

魏寧

綦母懷文

張子信

陸法和

蔣昇

強練

庾季才子質

盧太翼

耿詢

來和

蕭吉

楊伯醜

臨孝恭



劉祐

張胃玄

列傳第七十八

藝術下

北史九十

周澹

李脩

徐塞

從孫之才

王顯

馬嗣明

姚僧垣

褚該

許智藏

萬寶常

蔣少游

何稠

列傳第七十九

烈女

北史九十一

魏崔覽妻封氏

封卓妻劉氏

魏溥妻房氏

胡長命妻張氏

平原女子孫氏

房愛親妻崔氏

涇州貞女兒氏

姚氏婦楊氏

張洪祁妻劉氏

董景起妻張氏

陽尼妻高氏

史映周妻耿氏

任城國太妃孟氏

苟金龍妻劉氏

貞孝女宗

河東姚氏女

刁思遵妻魯氏

西魏孫道溫妻趙氏

孫神妻陳氏

隨蘭陵公主

南陽公主

襄城王恪妃

華陽王楷妃

譙國夫人洗氏

鄭善果母崔氏

孝女王舜

韓覬妻于氏

陸讓母馮氏

劉昶女

鍾士雄母蔣氏

孝婦覃氏

元務光母盧氏

裴倫妻柳氏

趙元楷妻崔氏

列傳第八十

恩幸

北史九十二

王叡

王仲興

寇猛

趙脩

茹皓

趙邕

侯剛

徐紇

宗愛

仇洛齊

段霸

王琚

趙默

孫小

張宗之

劇鵬

張祐

抱疑

王遇

符承祖

王質

李堅

秦松

白整

劉騰

賈粲

楊範

成軌

王溫

孟欒

平季

封津

劉思逸

郭秀

和士開

穆提婆

高阿那肱

韓鳳

齊諸官者

列傳第八十一

北史九十三

僭偽附庸

夏

赫連氏

燕

慕容氏

後秦

姚氏

北燕

馮氏

西秦

乞伏氏

北涼

沮渠氏

梁

蕭氏

列傳第八十二

北史九十四

高麗

百濟

新羅

勿吉

奚

契丹

室韋

豆莫婁

地豆干

烏洛侯

流求

倭

列傳第八十三

北史九十五

蠻獠

林邑

赤土

真臘

婆利

列傳第八十四

北史九十六

氏

吐谷渾

宕昌

鄧至

白蘭

党項

附國

稽胡

列傳第八十五

北史九十七

西域

列傳第八十六

北史九十八

蠕蠕

匈奴宇文莫槐

徒何段就六眷

高車

列傳第八十七

北史九十九

突厥

鐵勒

序傳第八十八

北史一百

序傳

北史目錄



周已千孫粹然 校正

魏本紀第一

北史一

魏之先出自黃帝軒轅氏黃帝子曰昌意昌意之少子受封北國有大鮮卑山因以爲號其後世爲君長統幽都之北廣漠之野畜牧遷徙射獵爲業淳樸爲俗簡易爲化不爲文字刻木結繩而已時事遠近人相傳授如史官之紀錄焉黃帝以土德王北俗謂土爲托謂后爲跋故以爲氏其裔始均仕堯時逐女魃於弱水北人賴其勲舜命爲田祖歷三代至秦漢獯鬻獫狁山戎匈奴之屬累代作害中州而始均之裔不交南夏是以載籍無聞積六七十代至成皇帝諱毛立統國三十六大姓九十九威振北方成帝

崩節皇帝貸立節帝崩莊皇帝觀立莊帝崩明皇帝樓立  
明帝崩安皇帝越立安帝崩宣皇帝推寅立宣帝南遷大  
澤方千餘里歿土昏冥沮洳謀更南徙未行而崩景皇帝  
利立景帝崩元皇帝俟立元帝崩和皇帝肆立和帝崩定  
皇帝機立定帝崩僖皇帝蓋立僖帝崩威皇帝僧立威帝  
崩獻皇帝隣立時有神人言此土荒遐宜徙建都邑獻帝  
年老乃以位授子聖武皇帝命南移山谷高深九難八阻  
於是欲止有神獸似馬其聲類牛導引歷年乃出始居匈  
奴故地其遷徙策略多出宣獻二帝故時人並號曰推寅  
蓋俗云鑽研之義

聖武皇帝諱詰汾嘗田於山澤歟見輜輶自天而下既至見美婦人自稱天女受命相遇旦日請還期年周時復會于此言終而別及堦帝至先田處果見天女以所生男授帝曰此君之子也當世爲帝王語訖而去即始祖神元皇帝也故時人諺曰詰汾皇帝無婦家力微皇帝無舅家帝崩神元皇帝立

神元皇帝諱力微元年歲在庚子先是西部內侵依於沒鹿迴部大人竇賓神元有雄傑之度後與賓攻西部賓軍敗失馬步走神元使以所乘駿馬給之賓歸求馬主帝隱而不言賓後知大驚將分國之半奉帝帝不受乃進其愛

女賓猶思報恩乃從帝所欲徙所部北居長川積數年舊部人咸來歸附及賓臨終戒其二子使謹奉神元其子不從乃陰謀逆帝召殺之盡并其衆諸部大人悉服控弦之士二十餘萬三十九年遷於定襄之盛樂四月祭天諸部君長皆來助祭唯白部大人觀望不至徵而戮之遠近肅然帝乃告諸大人爲與魏和親計四十二年遣子文帝如魏且觀風土是歲魏景元二年也文帝諱沙漠汗以國太子留洛陽後文帝以神元春秋已高求歸晉武帝具禮護送五十六年文帝復如晉其冬還國晉征北將軍衛瓘以文帝雄異恐爲後患請留不遣復請以金錦賂國之大人

令致間隙五十八年方遣帝神元使諸部大人詣陰館迎  
帝酒酣帝仰視飛鳥飛丸落之時國俗無彈衆大驚相謂  
曰太子被服同南夏兼奇術絕人若繼國統變易舊俗吾  
等必不得志乃謀危害帝並先馳還曰太子引空弓而落  
飛鳥似得晉人異法自帝在晉後諸子愛寵神元頗有所  
惑及聞諸大人請因曰當便除之於是諸大人馳詣塞南  
矯害帝其年神元不豫烏丸王庫賢親近任勢先受衛瓘  
之貨欲沮動諸部因於庭中礪鉞斧曰上恨汝曹讒殺太  
子欲盡收諸大人長子殺之大人皆信各各散走神元尋  
崩凡饗國五十八年年一百四歲道武即位尊爲始祖子

北史卷一百一  
章皇帝悉鹿立時諸部離叛帝九年而崩弟平皇帝綽立  
七年而崩文帝少子思皇帝立

思皇帝諱弗政崇寬簡百姓懷服一年而崩神元子昭帝  
祿官立帝九年分國爲三部一居上谷北濡源西東接宇  
文部自統之一居代郡之參合陂北使文帝長子桓帝諱  
猗屯統之一居定襄之盛樂故城使桓帝弟穆帝猗盧統  
之自神元以來與晉和好是歲穆帝始出并州遷雜胡北  
徙雲中五原朔方又西度河擊匈奴烏丸諸部自杏城以  
北八十里迄長城原夾道立碣與晉分界二年葬文帝及  
皇后封氏初思帝欲改葬未果而崩至是述成前意焉三

年桓帝度漠北巡因西略諸國凡積五歲諸部降附者三十餘國桓帝英傑魁岸馬不能勝常乘安車駕大牛牛角容一石帝曾中蠱嘔吐之地仍生榆參合陂土無榆故時人異之十年匈奴別種劉元海反晉於離石自號漢王并州刺史司馬騰來乞師桓帝與帝大舉以助之大破元海衆於西河上黨桓帝與騰盟於汾東而還乃使輔相衛雄段熲於參合陂西累石爲亭樹碑以記行焉十一年晉假桓帝大單于金印紫綬是歲桓帝崩桓帝統部凡十一年後定襄侯衛操樹碑於大邦城以頌功德子普根代立十三年昭帝崩穆帝遂摠攝三部爲一統帝天姿英峙勇略



過人元年劉元海僭帝號自稱大漢三年晉并州刺史劉琨遣子導爲質乞師帝使弟子平文皇帝助琨破白部大人次攻鐵弗劉武晉懷帝進帝大單于封代公帝以封邑去國縣遠從琨求句注陞北地琨大喜乃徙馬邑陰館樓煩繁峙崞五縣人於陞南更立城邑盡獻其地東接代郡西連西河朔方數百里帝乃徙十萬家以充之六年城盛樂以爲北都脩故平城以爲南都帝登平城西山觀望地勢乃更南百里於灑水之陽黃瓜堆築新平城晉人謂之小平城使子六脩鎮之統領南部八年晉愍帝進帝爲代王置官屬食代常山二郡先是國俗寬簡至是明刑峻法

諸部人多以違命得罪凡後期者皆舉部戮之或有室家相攜悉赴死所人問何之曰當就誅其威嚴若此九年帝召六脩不至怒討之失利遂崩普根先守外境聞難來攻六脩滅之普根立月餘薨普根子始生桓帝后立之又薨思帝子平文皇帝立

平文皇帝諱鬱律姿質雄壯甚有威略元年歲在丁丑二年劉武據朔方來侵西部帝大破之西兼烏孫故地東吞勿吉以西控弦上馬將百萬是歲晉元帝即位於江南劉曜僭帝位帝聞晉愍帝爲曜所害顧謂大臣曰今中原無主天其資我乎曜遣使請和帝不納三年石勒自稱趙王

遣使乞和請爲兄弟帝斬其使以絕之五年晉元帝遣使  
韓暢加崇爵服帝絕之講武有平南夏志桓帝后以帝得  
衆心恐不利己子害帝遂崩大人死者數十人天興初追  
尊曰太祖

桓帝中子惠帝賀傁立以五年爲元年帝未親政事太后  
臨朝遣使與石勒通和時人謂之女國使四年帝始臨朝  
以諸部人情未悉款順乃築城於東木根山徙都之五年  
帝崩弟煬帝紇那立以五年爲元年三年石勒遣石季龍  
寇邊部帝禦之不利遷於大寧時平文帝長子烈帝居於  
舅賀蘭部帝遣使求之賀蘭部帥藹頭擁護不遣帝怒召

宇文部并力擊諱頭宇文衆敗帝還大寧五年帝出居於宇文部賀蘭及諸部大人共立烈帝

烈皇帝諱翳槐以五年爲元年石勒遣使求和帝遣弟昭成帝如襄國徙者五千餘家七年諱頭不脩臣職召而戮之國人復貳於是煬帝自宇文部還入諸部大人復奉之煬帝以烈帝七年爲後元年時烈帝出居於鄴三年石季龍納烈帝於大寧國人六千餘家部落叛煬帝出居於慕容部烈帝復立以煬帝三年爲後元年城盛樂城在故城東南十里一年而崩弟昭成皇帝立

昭成皇帝諱什翼犍平文皇帝之次子也生而奇偉寬仁

大度身長八尺隆準龍顏立髮委地卧則乳垂至席烈帝  
臨崩顧命迎帝曰立此人則社稷乃安故帝弟孤自詣鄴  
奉迎與帝俱還建國元年十一月帝即位於繁時北時年  
十九二年春始置百官分掌衆職東自穢貊西及破落那  
莫不款附五月朝諸大人於參合陂議定都灑源川連日  
不決乃從太后計而止娉慕容晃妹爲皇后三年春移都  
雲中之盛樂宮四年築盛樂城於故城南八里皇后慕容  
氏崩十月劉武寇西境帝遣軍大破之武死子務桓立始  
來歸順帝以女妻之七年二月遣大人長孫秩迎后慕容  
氏於和龍晃送女於境七月慕容晃遣使來聘求交婚帝

許之以烈帝女妻焉十四年帝以中州紛梗將親率六軍  
乘石氏之亂廓定中原諸大人諫乃止十八年太后王氏  
崩十九年正月劉務桓死其弟閼頭立潛謀反二十一年  
閼頭部人多叛懼而東走度河半濟而冰陷後衆盡歸其  
兄子悉勿祈初閼頭之叛悉勿祈兄弟十二人在帝左右  
盡遣之歸欲其自相猜離至是悉勿祈奪其衆閼頭窮而  
歸命帝待之如初二十二年春帝東巡桑乾川四月悉勿  
祈死弟衛辰立二十三年六月皇后慕容氏崩七月衛辰  
來會葬因求婚許之二十五年帝南巡君子津二十八年  
正月衛辰謀反度河東帝討之衛辰懼遁走三十年十月

帝征衛辰時河冰未成帝乃以葦絙約漸俄然冰合乃散葦於上冰草相結若浮橋衆軍利涉衛辰與宗族西走收其部落而還三十四年春長孫斤謀反伏誅斤之反也按刃向御坐太子寔格之傷脇五月薨後追謚焉是爲獻明皇帝七月皇孫珪生大赦三十九年苻堅遣其大司馬苻洛帥衆二十萬及其將朱彤張蚝鄧羌等諸道來寇王師不利帝時不豫乃率國人避於陰山之北高車雜種盡叛四面寇抄不得芻牧復度漠南堅軍稍退乃還十二月至雲中旬有二日皇子寔君作亂帝暴崩時年五十七道武即位尊曰高祖帝性寬厚時國少繒帛代人許謙盜絹二

足守者以告帝匿之謂燕鳳曰吾不忍視謙之面卿勿洩之謙或慙而自殺爲財辱士非也帝嘗擊西部叛賊流矢中目賊破後諸大臣執射者各持錐刀欲屠割之帝曰各爲其主何罪也釋之其仁恕若此

太祖道武皇帝諱珪昭成皇帝之嫡孫獻明帝之子也母曰獻明賀皇后初因遷徙游於雲澤寢夢日出室內寤而見光自牖屬天欬然有感以建國三十四年七月七日生帝於參合陂北其夜復有光明昭成大悅羣臣稱慶大赦告于祖宗保者以帝體重倍於常兒竊獨奇怪明年有榆生於藏胞之坎後遂成林帝弱而能言目有光曜廣顙大



耳六歲而昭成崩符堅遣將內侮將遷帝長安賴燕鳳乃免堅軍旣還國衆離散堅使劉庫仁劉衛辰分攝國事南部大人長孫嵩及元他等盡將故人衆南依庫仁帝於是轉在獨孤部元年葬昭成皇帝於金陵營梓宮木材盡生成林帝雖冲幼而嶷然不群劉庫仁常謂其子曰帝有高天下之志必興復洪業七年十月晉敗苻堅于淮南慕容文等殺劉庫仁弟眷代攝國部八年慕容暉弟冲僭立姚萇自稱大單于萬年秦王慕容垂僭稱燕王九年劉庫仁子顯殺眷而代之乃將謀逆商人王霸知之獲帝足於衆中帝乃馳還是時故大人梁盆子六眷爲顯謀主盡知其

計密使部人穆崇馳告帝乃陰結舊臣長孫獫狁他等因  
幸賀蘭部其日顯果使人殺帝不及語在獻明太后傳是  
歲乞伏國仁私署秦河二州牧大單于姚萇殺苻堅娶子  
丕僭即皇帝位於晉陽

登國元年春正月戊申帝即代王位郊天建元大會於牛  
川復以長孫嵩爲南部大人以叔孫普洛爲北部大人是  
月慕容垂僭即皇帝位於中山國號燕二月幸定襄之盛  
樂息衆課農慕容冲爲其部下所殺夏四月改稱魏王五  
月姚萇僭即皇帝位於長安國號大秦秋八月劉顯遣弟  
亢泥迎皇叔父窟咄于慕容永以兵隨之來逼南境帝左

右于桓等與諸部大人謀應之事洩誅造謀者五人餘悉  
不問帝慮內難乃北踰陰山幸賀蘭部阻山爲固遣行人  
安同長孫賀徵師于慕容垂垂令其子賀麟率師隨同等  
軍未至而寇逼於是北部大人叔孫普洛等十三人及諸  
烏丸亡奔衛辰帝自弩山幸牛川屯于延水南出代谷會  
賀麟於高柳大破窟咄悉收其衆冬十月苻丕爲晉將馮  
該所殺慕容永僭即皇帝位於長子十一月苻登僭即皇  
帝位於隴東十二月慕容垂遣使奉帝西單于印綬封上  
谷王帝不納

二年夏五月遣安同徵兵於慕容垂垂遣子賀麟率衆來

會六月帝親征劉顯顯奔慕容永盡收其部落冬十二月  
巡松漠還幸牛川

三年夏五月癸亥北征庫莫奚大破之六月乞伏國仁死  
其弟乾歸立私署河南王秋七月庫莫奚部帥鳩集遺散  
夜犯行宮縱騎撲討盡滅之八月使九原公儀於慕容垂  
冬十月垂遣使朝貢

四年春正月甲寅襲高車諸部落二月癸巳遂至女水討  
叱突隣部竝大破之是月呂光自稱三河王夏五月使陳  
留公虔於慕容垂冬十月垂遣使朝貢

五年春三月甲申西征次鹿渾海襲高車表紇部大破之

慕容垂遣子賀麟來會夏四月景寅行幸意辛山與賀麟  
討賀蘭純奚諸部落大破之秋八月還幸牛川使秦王觚  
於慕容垂九月壬申討叱奴部囊曲水破之冬十月討高  
車豆陳部於狼山破之十二月帝還次白漠

六年春正月幸紐垤川三月遣九原公儀陳留公虔等西  
討黠弗部大破之夏四月祭天秋七月壬申講武于牛川  
慕容垂止秦王觚而求名馬帝絕之乃遣使於慕容永永  
使其大鴻臚慕容鈞奉表勸進尊號九月帝襲五原屠之  
收其積穀還紐垤川於柁陽塞北樹碑記功冬十月戊戌  
北征蠕蠕追破之於大磧南商山下十一月戊辰還幸紐

埵川戊寅衛辰遣子直力鞬寇南部壬午帝大破之於鐵  
岐山南衛辰父子奔遼十二月滅之衛辰少子屈丐亡奔  
薛于部自河以南諸部悉平收衛辰子弟宗黨無少長五  
千餘人盡殺之是歲起河南宮

七年春正月幸木根山遂次黑鹽池饗羣臣北之美水三  
月還幸河南宮秋七月行幸漠南仍築巡臺冬十二月慕  
容永遣使朝貢

八年春正月南巡二月幸殺羊原赴白樓夏六月北巡秋  
七月臨幸新壇先是衛辰子屈丐奔薛于部徵之不送八  
月帝南征薛于部署其城九月還幸河南宮

九年春三月北巡使東平公元儀屯田於河北五原至於  
相陽塞外夏五月田於河東秋七月還幸河南宮冬十月  
蠕蠕杜崙等率部落西走是歲姚萇子興僭立殺苻登慕  
容垂滅求

十年秋七月慕容垂遣其子寶來寇五原八月帝親兵於  
河南冬十月辛未寶燒船夜遁己卯帝進軍濟河乙酉夕  
至參合陂景戌大破之禽其王公以下文武將吏數千人  
於俘虜中擢其才識者賈彝賈閏晁崇等參謀議憲章故  
實十二月還幸雲中之盛樂

皇始元年春正月太蒐于定襄因東幸善無北陂三月慕容

容垂冠桑乾川陳留公虔死之垂遂至平城西北聞帝將  
至乃築城自守疾甚遂遁死於上谷子寶秘喪還至中山  
乃僭立夏六月丁亥皇太后賀氏崩是月葬獻明太后呂  
光僭稱天王國號涼秋七月左司馬許謙上書勸進尊號  
於是改元始建天子旌旗出警蹕八月己亥大舉討慕容  
寶帝親勒六軍四十餘萬南出馬邑踰句注旌旗絡驛  
二千餘里鼓行而前人屋皆震別詔將軍封真等從東道  
襲幽州圍薊九月戊午次陽曲乘西山臨觀晉陽寶并州  
牧遼西王農棄城遁并州平初建臺省置百官封拜公侯  
將軍刺史太守尚書郎以下悉用文人帝初拓中原留心



慰納諸士大夫詣軍門者無少長皆引入人得盡言苟有  
微能咸蒙敘用己未詔輔國將軍奚牧略地晉川獲慕容  
寶丹楊王買得等於平陶城九月晉孝武帝殂冬十一月  
庚子朔帝至真定自常山以東守宰或捐城奔竄或稽顙  
軍門唯中山鄴信都三城不下別詔東平公儀攻鄴冠軍  
將軍王建左軍將軍李栗等攻信都軍所行不得傷桑棗  
戊午進軍中山己未圍之帝曰朕量寶不能出戰必憑城  
自守急攻則傷士久守則費糧不如先平鄴信都然後還  
取中山諸將稱善丁卯車駕幸魯口城

二年春正月壬戌帝引騎圍信都其夜寶異州刺史宜都

王慕容鳳踰城奔中山癸亥寶輔國將軍張驤護軍將軍  
徐超舉城降是月鮮卑禿髮烏孤私署大單于西平王二  
月丁丑帝軍于鉅鹿之栢肆塢臨滹池水其夜寶悉衆犯  
營燎及行宮兵人駭散帝驚起不及衣冠跣出擊鼓俄而  
左右及中軍將士稍集帝設奇陣列烽營外縱騎衝之寶  
衆大敗走還中山獲其器械數十萬計寶尚書閔亮祕書  
監崔逞等降者相屬賜拜職爵各有差三月己酉車駕次  
盧奴寶求和請送秦王觚割常山以西奉魏乞守中山以  
東帝許之已而寶背約辛亥車駕次中山命將圍之是夜  
寶弟賀麟將妻子走西山寶恐賀麟先據和龍壬子夜北

遁城內共立慕容皝爲主夏四月帝以軍糧不繼詔東平公儀罷鄴圍徙屯鉅鹿五月庚子帝以中山城內爲普隣所脅乃招喻之甲辰曜兵揚威以示城內命諸軍罷圍南徙以待其變甲寅以東平公儀爲左丞相封衛王進襄城公題爵爲王秋七月普隣遣烏丸張驤率五千餘人出城求食寇靈壽賀麟自丁零中入驤軍因其衆復入中山殺普隣而自立八月景寅朔帝進軍九門時大疫人馬牛死者十五六中山猶拒守羣下咸思北還帝知之謂曰斯固天命將若之何四海之人皆可與爲國在吾所以撫之耳何恤乎無人羣臣乃不敢言九月賀麟飢窮率三萬餘

人寇新市甲子晦帝進軍討之太史令晁崇奏曰不吉帝  
曰何也對曰紂以甲子亡兵家忌之帝曰周武不以甲子  
勝乎崇無以對冬十月景寅帝進軍新市賀麟退阻泚水  
依漸洳澤以自固甲戌帝臨其營戰於義臺塢大破之賀  
麟單馬走鄴慕容德殺之甲申賀麟所署公卿尚書將吏  
士卒降者二萬餘人其將張驤李沈慕容文等先來降尋  
皆亡還是日復獲之皆赦而不問獲其所傳皇帝璽綬圖  
書府庫珍寶中山平乙酉襄城王題薨

天興元年春正月慕容德走保滑臺衛王儀剋鄴庚子行  
幸真定遂幸鄴百姓有老病不能自存者詔郡縣振卹之

帝至鄴巡登臺榭徧覽宮城將有定都之志乃置行臺遂還中山所過存問百姓詔大軍所經州郡皆復貲租一年除山東人租賦之半車駕將北還發卒萬人通直道自望都鐵關鑿恒嶺至代五百餘里帝慮還後山東有變乃於中山置行臺詔衛王儀鎮之使略陽公遵鎮勃海之合口右軍將軍尹國先督租于異州聞帝將還謀反欲襲信都安南將軍長孫嵩執送斬之辛酉車駕發中山至于望都堯山徙山東六州人吏及徙何高麗新夷三十六署百工伎巧十餘萬口以充京師車駕次于怕山之陽博陵勃海章武諸郡羣盜並起略陽公遵等討之是月慕容德自稱

燕王據廣固二月車駕至自中山幸繁時宮更選屯衛詔  
給內徙新戶耕牛計口受田三月徵左丞相衛王儀還京  
師詔略陽公遵代鎮中山夏四月壬戌以歷陽公穆崇爲  
太尉鉅鹿公長孫嵩爲司徒進封略陽公遵爲常山王南  
安公順爲毗陵王祭天於西郊旗幟有加焉廣平太守遼  
西公意列謀反與郡人韓竒矯假讖圖將襲鄴城詔反者  
就郡賜死是月蘭汗殺慕容寶而自立爲大單于昌黎王  
六月景子詔有司議定國號羣臣奏曰昔周秦以前帝王  
居所生之土及王天下即承爲號今國家啓基雲代應以  
代爲號詔曰昔朕遠祖摠御幽都控制遐國雖踐王位未

定九州逮于朕躬掃平中土山逆蕩除遐邇率服宜仍先  
號爲魏秋七月遷都平城始營宮室建宗廟立社稷慕容  
寶子盛殺蘭汗而自立爲長樂王八月詔有司正封畿制  
郊甸端徑術櫛道里平五權較五量定五度遣使循行郡  
國舉奏守宰不法者親覽察黜陟之冬十月起天文殿十  
一月辛亥尚書吏部郎中鄧彥海典官制立爵品定律呂  
協音樂儀曹郎中董謚撰郊廟社稷朝覲饗宴之儀三公  
郎中王德定律令申科禁太史令晁崇造渾儀考天象吏  
部尚書崔宏揔裁之閏月左丞相衛王儀及王公卿士詣  
闕上書曰臣等聞宸極居中則列宿齊其暑帝王順天則

羣后仰其度伏惟陛下德協二儀道隆三五仁風被于四海盛化塞于天區澤及昆蟲恩霑行葦謳歌所屬八表歸心而躬履謙虛退身後已宸儀未彰衮服未御非所以上允皇天之意下副樂推之心臣等謹昧死以聞帝三讓乃許之十二月己丑帝臨天文殿太尉司徒進璽綬百官咸稱萬歲大赦改元追尊成帝以下及后號謚樂用皇始之舞詔百司議定行次尚書崔宏等奏從土德服色尚黃數用五祖以未臘以辰犧牲用白五郊立氣宣贊時令敬授人時行夏之正徙六州二十二郡守宰豪傑吏人二千家于代都



二年春正月甲子初祀上帝于南郊以始祖神元皇帝配  
降壇視燎成禮而反乙丑赦京師始制三駕之法庚午北  
巡分命諸將大龍表高車常山王遵三軍從東道出長川高  
涼王樂真等七軍從西道出牛川車駕親勒六軍從中道  
自駁驄水西北出二月丁亥朔諸軍同會破高車雜種三  
十餘部衛王儀督三將別從西北絕漠千餘里破其遺迸  
七部還次牛川及薄山竝刻石紀功以所獲高車衆起鹿  
苑於南臺陰北距長城東苞白登屬之西山廣輪數十里  
鑿渠引武川水注之苑中䟽爲三溝分流宮城內外又穿  
鴻鴈池三月己未車駕至自北伐甲子初令五經羣書各

置博士增國子太學生員三千人是月氏人李辯叛慕容  
德求援於鄴行臺尚書和跋以輕騎應之剋滑臺收德宮  
人府藏秋七月起天華殿辛酉大閱于鹿苑八月增啓京  
城十二門作西武庫除州郡人租賦之半辛亥詔禮官備  
撰衆儀著于新令范陽人盧溥聚衆海濱稱幽州刺史攻  
掠郡縣殺幽州刺史封沓于是月禿髮烏孤死其弟利鹿  
孤立遣使朝貢冬十月太廟成遷神元平文昭成獻明皇  
帝神主于太廟十二月天華殿成呂光立其子紹爲天王  
自稱太上皇及死庶子纂殺紹而僭立

三年春正月戊午材官將軍和突破盧溥於遼西獲之及

其子煥傳送京師輶之癸亥祀北郊分命諸官循行州郡  
觀風俗察舉不法二月丁亥詔有司祀日于東郊始耕籍  
田壬寅皇子聰薨三月戊午立皇后慕容氏是月穿城南  
渠通於城內作東西魚池夏四月姚興遣使朝貢五月戊  
辰詔謁者僕射張濟使於興己巳東巡遂幸涿鹿遣使者  
以太牢祀帝堯帝舜廟西幸馬邑觀灋源六月庚辰朔日  
有蝕之秋七月乞伏乾歸大爲姚興所破壬子車駕還宮  
起中天殿及雲母堂金華室時太史屢奏天文錯亂帝親  
覽經占多云宜改王易政於是數革官號欲以防塞凶狡  
消弭災變已而慮臣下疑惑冬十二月景申下詔述成敗

之理鑒殷周之失革秦漢之弊以喻臣下是歲河右諸郡  
奉涼武昭王李玄盛爲秦涼二州牧涼公肇興霸業年號  
庚子

四年春二月丁亥命樂師入學習舞釋菜于先聖先師丁  
酉分命使者巡行州郡聽察辭訟糾劾不法是月呂光弟  
子隆弒呂纂而自立三月帝親漁薦于寢廟夏四月辛卯  
罷鄴行臺詔有司明楊隱逸五月起紫極殿玄武樓涼風  
觀石池鹿苑臺六月盧水胡沮渠蒙遜移署涼州牧張掖  
公秋七月詔兗州刺史長孫肥南徇許昌彭城詔賜天下  
鎮戍將士布帛各有差八月段興殺慕容盛叔父熙盡誅

段氏僭即皇帝位冬十二月集博士儒生比衆經文字義類相從凡四萬餘字號曰衆文經是歲涼武昭王沮渠蒙遜竝遣使朝貢

五年春正月帝聞姚興將寇邊庚寅大簡輿徒詔并州諸軍積穀于平陽乾壁三月禿髮利鹿孤死夏五月姚興遣其弟義陽王平來侵平陽攻陷乾壁秋七月戊辰朔車駕西討八月乙巳至乾壁平固守進軍圍之姚興悉舉其衆來救申子帝度蒙坑逆擊興軍大破之冬十月平赴水而死俘其餘衆三萬餘人獲興尚書左僕射狄伯支以下四品將軍以上四十餘人獲前亡臣王次多靳勒竝斬以徇

興頻使請和帝不許羣臣請進平蒲坂帝慮蠕蠕爲難戊申班師十一月車駕次晉陽徵相州刺史庾岳爲司空十二月辛亥至自西征越勒莫弗率其部萬餘家內屬

六年春正月辛未朔方尉遲部別帥率萬家內屬入居雲中夏四月癸巳朔日有蝕之五月大簡輿徒將略江淮秋七月鎮西大將軍司隸校尉毗陵王順有罪以王還第戊子北巡築離宮于豺山縱士校獵東北踰劉嶺出參合代谷九月行幸南平城規度灑南夏屋山背黃瓜堆將建新邑辛未車駕還宮冬十月起西昭陽殿乙卯立皇子嗣爲齊王加車騎大將軍位相國紹爲清河王加征南大將軍

熙爲陽平王曜爲河南王封故秦愍王子萇爲豫章王陳留桓王子悅爲朱提王丁巳晉人來聘十一月庚午將軍伊謂大破高車十二月晉桓玄廢其主司馬德宗爲平固王而自立僭號楚

天賜元年春二月晉劉裕起兵誅桓玄三月初限縣戶不滿百罷之夏五月置山東諸治發州郡徒謫造兵甲秋九月帝臨昭陽殿分置衆職引朝臣文武親自簡擢量能叙用制爵四等曰王公侯子除伯男之號追錄舊臣加封爵各有差是秋江南大亂流人繼負奔淮北者行道相尋冬十月辛巳大赦改元築西宮十一月幸西宮大選臣寮令

各辯宗黨保舉才行諸部子孫失業賜爵者二千餘人

二年春正月晉主司馬德宗復位夏四月祀西郊車旗盡  
黑冬十月慕容德死

三年春正月甲申北巡幸射山宮校獵還至屋孤山二月

乙亥幸代園山建五石亭三月庚子車駕還宮夏四月庚

申復幸射山宮占授著作郎王具弟造兵法孤虛立成圖

三百六十時遂登定襄角史山又幸馬城甲戌車駕還宮

六月發八部五百里內男子築灋南宮門闕高十餘丈引

溝穿池廣苑囿規立外城方二十里分置市里經途洞達

三十日罷秋七月太尉穆崇薨八月甲辰行幸射山宮遂



至青牛山景辰西登武要北原觀九十九泉造石亭遂之  
石漠九月甲戌朔幸漠南鹽池壬午至漠中觀天鹽池度  
漠北之吐鹽池癸巳南還長川景申臨觀長陂冬十月庚  
申車駕還宮

四年春二月封皇子脩爲河間王處文爲長樂王連爲廣  
平王黎爲京兆王夏五月北巡自參合陂東過蟠羊山大  
雨暴水流輜車數百乘殺百餘人遂東北踰石漠至長川  
幸濡源常山王遵有罪賜死六月赫連屈丐自稱大單于  
大夏天王秋七月西幸參合陂築北宮垣三旬而罷乃還  
宮慕容寶養子高雲殺慕容熙而自立僭號天王八月誅

司空庾岳

五年春正月行幸豺山宮遂如參合陂觀漁于延水至甯川三月姚興遣使朝貢秋七月戊戌朔日有蝕之冬十月禿髮傳檀儋即涼王位

六年夏帝不豫初帝服寒食散自太醫令陰荒死後藥數動發至此愈甚而災變屢見憂懣不安或數日不食或不寢達旦歸咎羣下喜怒乖常謂百寮左右不可信慮如天文之占或有肘腋之虞追思既往成敗得失終日竟夜獨語不止若傍有鬼物對揚者朝臣至前追其舊惡便見殺害其餘或以顏色變動或以喘息不調或以行步乖節或

以言辭失措帝以爲懷惡在心變見於外乃手自毆擊死者皆陳天安殿前於是朝野人情各懷危懼有司廢怠莫相督攝百工偷劫盜賊公行巷里之間人爲稀少帝亦聞之曰朕故縱之使然幸過災年當更清整之耳秋七月慕容氏支屬百餘家謀欲外奔發覺伏誅死者三百餘人八月衛王儀謀叛賜死十月戊辰清河王紹作亂帝崩於天安殿時年二十九永興二年九月甲寅上謚曰宣武皇帝葬於盛樂金陵廟號太祖泰常五年改謚曰道武

太宗明元皇帝諱嗣道武皇帝之長子也母曰劉貴人登國七年生於雲中宮道武晚有男聞而大悅乃大赦帝明

敬寬毅非禮不動天興六年封齊王拜相國初帝母既賜死道武召帝告曰昔漢武將立其子而殺其母不令婦人與國政汝當繼統故吾遠同漢武帝素純孝哀不自勝道武怒帝還宮哀不自止道武知而又召帝帝欲入左右諫請待和解而進帝從之及元紹之逆帝還而誅之

永興元年冬十月壬午皇帝即位大赦改元追尊皇妣爲宣穆皇后公卿大臣先罷歸第者悉復登用之詔南平公長孫嵩北新侯安同對理人訟簡賢任能是月馮跋弒其主高雲僭號天王國號北燕閏十月丁亥朱提王悅謀反賜死詔都兵將軍山陽侯奚斤巡諸州問人疾苦十二月

戊戌封衛王儀子良爲南陽王進陰平公列爵爲王改封  
高涼王樂真爲平陽王己亥帝始居西宮御天文殿蠕蠕  
犯塞是歲乞伏乾歸自稱秦王

二年春正月甲寅朔詔南平公長孫嵩等北征蠕蠕因留  
屯漠南夏五月嵩等自大漠還蠕蠕追圍之於牛川壬申  
帝北伐蠕蠕聞而遁走車駕還幸參合陂六月晉將劉裕  
滅慕容超秋七月丁巳立射臺於陂西仍講武乙丑至自  
北伐

三年春二月戊戌詔簡宮人非御及伎巧者悉以賜鰥人  
己亥詔北新侯安同等持節巡行并定二州及諸山居雜

胡丁零問其疾苦察舉守宰不法者辛丑簡宮人工伎之  
不急者出賜人不能自存者三月己未詔侍臣常佩劍夏  
五月景寅復出宮人賜鯨人辛卯車駕謁金陵於盛樂己  
巳昌黎王慕容伯兒謀反伏誅六月姚興遣使朝貢秋七  
月戊申賜衛士酺三日冬十一月丁未大閱于東郊

四年春二月癸未登獸圈射猛獸夏四月乙未宴羣臣於  
西宮使各獻直言勿有所諱六月乞伏乾歸爲兄子公府  
所弒閏月景辰大閱于東郊秋七月己巳朔東巡置四廂  
大將又放十二時置十二小將以山陽侯奚斤元城公屈  
行左右丞相己卯大獮于石會山戊子臨去畿陂觀漁庚

宣至于濡源西巡幸北部諸落八月壬子幸西宮臨板殿  
大饗羣臣命百姓大酺二日乙卯賜王公以下至宿衛將  
士布各有差冬十一月己丑賜宗室近屬南陽王良以下  
至於總麻親布帛各有差是月沮渠蒙遜僭稱西河王十  
二月丁巳北巡至長城而旋

五年春正月己巳大閱畿內男年十二以上悉集己卯幸  
西宮額帳大渠帥四十餘人詣闕奉貢賜以繒帛錦罽各  
有差乙酉詔諸州六十戶出戎馬一匹庚寅大閱于東郊  
署將帥以山陽侯奚斤爲前軍衆三萬陽平王熙等十二  
將各一萬騎帝臨白登躬自校覽二月庚戌幸高柳川癸

丑穿魚池於北苑庚午姚興遣使朝貢己卯詔使者巡行  
天下招延雋彥搜揚隱逸夏四月乙卯西巡五月乙亥行  
幸雲中舊宮之大室景子大赦六月西幸五原校獵于骨  
羅山獲獸十萬秋七月己巳還幸薄山帝登觀宣武游幸  
刻石頌德之處乃於其旁起石壇而薦饗焉賜從者大酺  
於山下前軍奚斤等破越勒倍泥部落於跋那山西徙二  
萬餘家而旋景成車駕自大室西南巡諸部落遂南次定  
襄大洛城東踰七嶺山田于善無川八月癸卯車駕還宮  
癸丑奚斤等班師甲寅帝臨白登山觀降人數軍實置新  
人於大甯給農器計口受田冬十一月癸酉大饗于西宮



姚興遣使朝貢請進女帝許之

神瑞元年春正月辛酉以禎瑞頻集大赦改元辛巳行幸繁時賜王公以下至于士卒百工布帛各有差二月戊戌車駕還宮乙卯起豐宮於平城東北夏六月乞伏熾盤滅禿髮儁檀秋七月晉將朱齡石滅蜀八月戊子詔馬邑侯元陞孫使於姚興姚興遣使朝貢九月丁巳朔日有蝕之冬十一月壬午詔使者巡行諸州校閱守宰資財非自家所齎悉簿爲贓守宰不如法聽百姓詣闕告之十二月景戌朔蠕蠕犯塞景申車駕北伐

二年春正月景辰車駕至自北伐二月丁亥大饗于西宮

甲辰立宣武廟于白登西三月丁丑詔以刺史守宰率多  
逋情今年貲調縣違者謫出家財以充不聽徵發於人夏  
四月晉人來聘己卯北巡五月丁亥次於參合東幸大寧  
丁未田于四岬山六月戊午臨去畿陂觀漁辛酉次于濡  
源立螭臺遂射白熊於類牛山獲之丁卯幸赤城親見長  
老問人疾苦復租一年南次石亭幸上谷問百年訪賢雋  
復田租之半壬申幸涿鹿登嶠山觀溫泉使以太牢祠黃  
帝唐堯廟癸酉幸廣寧事如上谷己卯登廣寧之歷山以  
太牢祠舜廟帝親加禮焉庚辰幸代秋七月癸未車駕還  
宮復所過田租之半八月庚辰晦日有蝕之九月京師人

飢聽就食山東冬十月壬子姚興使奉其西平公主至帝  
以后禮納之辛酉行幸沮洳城癸亥車駕還宮景寅詔以  
頻遇霜旱年穀不登命出布帛倉穀以振貧窮

泰常元年春二月丁未姚興死三月己丑長樂王處文薨  
夏四月壬子大赦改元庚申河間王脩薨五月甲申彗星  
二見六月丁巳北巡秋七月甲申大獮于牛川登金山臨  
殷繁水南觀于九十九泉戎車駕還宮辛亥晦日有蝕  
之九月晉劉裕溯河伐姚泓遣部將王仲德從陸道至梁  
城兗州刺史尉建畏懦弃守北渡仲德遂入滑臺詔將軍  
叔孫建等度河曜威斬尉建於城下冬十一月戊寅起蓬

臺于北苑十二月南陽王良薨

二年春正月甲戌朔日有蝕之二月景午詔使者巡行天下觀風俗問其所苦是月涼武昭王薨五月西巡至雲中遂濟河田于大漠秋七月乙亥車駕還宮乙酉起白臺於城南高二十丈是月晉劉裕滅姚泓冬十月癸丑豫章王薨薨十二月己酉詔河東河內購泓子弟播越人聞者

三年春三月晉人來聘庚戌幸西宮以勃海范陽郡去年水復其租稅夏四月己巳徙冀定幽三州徙何於京師五月壬子東巡至濡源及甘松遣征東將軍長孫道生帥師龍驤跋逌至龍城徙其居人萬餘家而還秋七月戊午車

駕至京師八月鴈門河內大雨水復其租稅冬十月戊辰  
築宮於西苑十一月赫連屈丐克長安十二月晉安帝殂  
四年春正月壬辰朔車駕臨河大蒐于犢渚癸卯還宮三  
月赫連屈丐僭即皇帝位癸丑築宮於蓬臺北夏四月庚  
辰享東朝遠蕃助祭者數百國辛巳南巡幸鴈門賜所過  
無出今年租賦五月庚寅朔觀漁于灋水己亥車駕還宮  
秋八月辛未東巡遣使祠恒岳甲申車駕還宮賜所過無  
出今年田租九月甲寅築宮於白登山冬十一月丁亥朔  
日有蝕之十二月癸亥西巡至雲中踰白道北獵野馬於  
辱孤山至于黃河從君子津西度大狩於薛林山

五年春正月景戌朔自薛林東還至屋簷實城饗勞將士大  
酺二日班禽以賜之己亥車駕還宮二月景戌南陽王意  
文薨夏四月景寅起灋南宮五月乙酉詔曰宣武皇帝體  
得一之玄遠應自然之沖妙大行大名未盡盛美今啓緯  
圖始覩尊號其更上尊謚曰道武皇帝以章靈命之先啓  
聖德之玄同庚戌淮南侯司馬國璠池陽侯司馬道賜等  
謀反伏誅六月景寅幸驛犢山是月晉恭帝禪位于宋秋  
七月丁酉西至五原丁未幸雲中大室賜從者大酺八月  
癸亥車駕還宮閏月甲午陰平王烈薨是歲西涼亡  
六年春二月己亥詔天下戶二十輸戎馬一匹大牛一頭

三月甲子陽平王熙薨乙亥制六部人羊滿百口者調戎馬一匹發京師六千餘人築苑起自舊苑東苞白登周回四十餘里夏六月乙酉北巡至于蟠羊山秋七月乙卯車駕還宮癸酉西巡獵于柞山親射猛獸獲之遂至于河八月庚子大獮于犢渚九月庚戌車駕還宮壬申宋人來聘冬十月己亥行幸代十二月景申西巡于雲中

七年春正月甲辰朔自雲中西幸屋竇城賜從者大酺三日二月景戌車駕還宮三月乙丑河南王曜薨夏四月甲戌封皇子燾爲太平王拜相國加大將軍不爲樂平王加車騎大將軍彌爲安定王加衛大將軍範爲樂安王加中

軍大將軍健爲永昌王加撫軍大將軍崇爲建寧王加輔  
國大將軍俊爲新興王加鎮軍大將軍獻懷長公主子嵇  
敬爲長樂王拜大司馬大將軍初帝服寒食散頻年發動  
不堪萬機五月立太平王燾爲皇太子臨朝聽政是月宋  
武帝殂秋九月詔司空奚斤等帥師伐宋乙巳幸灋南宮  
遂如廣寧己酉詔皇太子率百國以法駕田于東苑車乘  
服物皆以乘輿之副辛亥築平城外郭周回二十二里辛  
酉幸嶠山遣使者祠黃帝唐堯廟因東幸幽州見耆年問  
其所苦賜以爵號分遣使者巡行州郡觀察風俗冬十月  
甲戌車駕還宮復所過田租之半奚斤等濟河攻滑臺不



拔求濟師帝怒不許議親南征爲其聲援壬辰南巡出自  
天門關踰恒嶺四方蕃附大人各帥所部從者五萬餘人  
十一月皇太子親統六軍鎮塞上安定王彌與北新公安  
同居守景午曲赦司州殊死以下景辰次於中山問人疾  
苦十二月景戌行幸冀州存問人俗遣壽光侯叔孫達等  
率衆自平原東度徇下青兗諸郡

八年春正月景辰行幸鄴存問人俗司空奚斤旣平兗豫  
還圍武牢宋守將毛德祖距守不下蠕蠕犯塞二月戊辰  
築長城於長川之南起自赤城西至五原延袤二千餘里  
備置戍衛三月乙卯濟自靈昌夏四月丁卯幸成皇觀武

牢而城內乏水縣綆汲河帝令連艦上施轆輶絕其汲路  
又穿地道以奪其井丁丑幸洛陽觀石經閏月丁未還幸  
河內北登太行幸高都已未武牢潰士衆大疫死者十二  
三辛酉幸晉陽班賜王公以下至於廝役五月景寅還次  
鴈門皇太子率留臺王公迎于句注之北庚寅車駕至自  
南巡六月己亥太尉宜都公穆觀薨景辰北巡至參合陂  
秋七月幸三會屋侯泉詔皇太子率百官以從八月幸馬  
邑觀于灋源九月乙亥車駕還宮冬十月癸卯廣西宮起  
外牆周回二十里是歲飢詔所在開倉振給十一月己巳  
帝崩於西宮時年三十二遺詔以司空奚斤所獲軍實賜

大臣自司徒長孫嵩以下至于士卒各有差十二月庚子  
上謚曰明元皇帝葬于雲中金陵廟稱太宗帝兼資文武  
禮愛儒生好覽史傳以劉向所撰新序說苑於經典正義  
多有所闕乃撰新集三十篇採諸經史該洽古義云

論曰自古帝王之興誠有天命亦賴累功積德方契靈心  
有魏奄宅幽方代爲君長神元生自天女桓穆勤於晉室  
冥符人事夫豈徒然昭成以雄傑之姿苞君人之量征伐  
四克威被遐荒乃改都立號恢隆大業終百六十載先宅  
區中其原固有由矣道武顯晦安危之中屈申潛躍之際  
驅率遺黎奮其靈武克翦方難遂啓中原垂拱人神顯登

皇極雖冠履不暇棲遑外土而制作經謨咸出長久所謂  
大人利見百姓與能抑不世之神武也而屯厄有期禍生  
非慮將人事不足豈天實爲之乎明元承運之初屬廓定  
之始于時狼顧鴟時猶有窺覲加以天賜之末內難尤甚  
帝孝心敵略權正兼運纂業固基內和外撫終能周鄭款  
服聲教南被祖功宗德其義良已遠矣

魏本紀第一

北史一

方洽周益周己千孫粹然校正

魏本紀第二

北史二

世祖太武皇帝諱燾明元皇帝之長子也母曰杜貴嬪天  
賜五年生於東宮體貌瓌異道武奇之曰成吾業者必此  
兒也泰常七年四月封太平王五月立爲皇太子及明元  
帝疾命帝摠攝百揆帝聰明大度意豁如也八年十一月  
己巳明元帝崩壬申太子即皇帝位大赦天下十二月追  
尊皇妣爲密皇太后進司徒長孫嵩爵爲北平王司空奚  
斤爲宜城王藍田公長孫翰爲平陽王其餘普增爵位各  
有差於是除禁錮釋嫌疑開倉庫振窮乏河南流人相率  
內屬者甚衆

始光元年春正月景寅安定王彌薨夏四月甲辰東巡幸  
大寧六月宋徐羨之弒其主義符秋七月車駕還宮八月  
蠕蠕六萬騎入雲中殺畧人吏攻陷盛樂帝帥輕騎討之  
虜乃退走九月大簡輿徒於東郊將北討冬十二月遣平  
陽王長孫翰等討蠕蠕車騎次柞山蠕蠕北遁諸軍追之  
大獲而還

二年春正月己卯車駕至自北伐二月景辰尊保母竇氏  
曰保太后丁巳以北平王長孫嵩爲太尉平陽王長孫翰  
爲司徒宜城王奚斤爲司空庚申營故東宮爲萬壽宮起  
永安安樂二殿臨望觀九華堂初造新宇千餘夏四月詔

龍驤將軍步堆使宋五月詔天下十家發大牛一頭運粟塞上秋八月赫連屈丐死九月永安安樂二殿成丁卯大饗以落之冬十月癸卯車駕北伐東西五道並出平陽王長孫翰等絕漠追寇蠕蠕北走

三年春正月壬申車駕至自北伐乞伏熾盤遣使朝貢請討赫連昌二月起太學於城東祀孔子以顏回配夏五月辛卯進中山公纂爵爲王復南安公素先爵常山王六月幸雲中舊宮謁陵廟西至五原田於陰山東至和堯山秋七月築馬射臺于長川帝親登臺走馬王公諸國君長馳射中者賜金錦繒絮各有差八月車駕還宮宋人來聘帝



以赫連屈丐死諸子相攻冬十月丁巳車駕西伐幸雲中  
臨君子津會大暴寒數日冰合十一月戊寅率輕騎襲赫  
連昌壬午徙萬餘家而還至祚山班虜獲以賜將士各有  
茅十二月詔奚斤西據長安秦隴氐羌皆叛昌詣斤降武  
都王陽玄及沮渠蒙遜等使使內附

四年春正月乙酉車駕至自西伐賜留臺文武各有老從  
人在道多死到者裁十六七己亥行幸幽州赫連昌遣其  
弟定向長安帝聞之遣就陰山伐木造攻具二月車駕還  
宮三月景午詔執金吾桓貸造橋於君子津丁丑廣平王  
連薨夏四月丁未詔負外散騎常侍步堆使於宋五月車

駕西討赫連昌次拔隣山築城舍輜重以輕騎三萬先行  
戊戌至黑水帝親祈天告祖宗之靈而誓衆六月癸卯朔  
日有蝕之甲辰大破赫連昌昌奔上邽乙巳車駕入城虜  
昌羣弟及其母妹妻妾宮人萬數府庫珍寶車旗器物不  
可勝計辛酉班師留常山王素執金吾桓貸鎮統萬秋七  
月己卯築壇於祚嶺戲馬馳射賜中者金帛繒絮各有差  
蠕蠕寇雲中聞破赫連昌懼而逃八月壬子車駕至自西  
伐飲至策勲告宗廟班軍實以賜留臺百寮各有差冬十  
一月以氏王楊玄爲假征南大將軍都督梁州刺史南秦  
王十二月行幸中山守貪汙免者十數人癸卯車駕還

宮復所過田租之半

神嘉元年春正月以天下守令多非法精選忠良悉代之  
辛未京兆王黎薨二月改元司空奚斤進軍安定監軍侍  
御史安頡出戰禽昌其餘衆立昌弟定爲主走還平涼三  
月辛巳侍中古弼送赫連昌至于京師司空奚斤追赫連  
定於平涼馬髦嶺爲定所禽將軍丘惟先在安定聞斤敗  
東走長安帝大怒詔頡令斬之夏四月赫連定遣使朝貢  
壬子西巡戊午田于河西大赦南秦王楊玄遣使朝貢五  
月乞伏熾盤死秋八月東幸廣寧臨觀溫泉以大牢祭黃  
帝堯舜廟九月車駕還宮冬十一月乙未朔日有蝕之是

月行幸河西大校獵十二月甲申車駕還宮

二年夏四月宋人來聘庚寅車駕北伐五月丁未次于沙漠舍輜重輕騎兼翼馬至粟水蠕蠕震怖焚廬舍絕跡西走冬十月振旅凱旋于京師告于宗廟列置新人于漠南東至蠕源西暨五原陰山竟三千里十一月西巡田于河西至柞山而還

三年春正月庚子車駕還宮壬寅大赦癸卯行幸廣寧臨溫泉作溫泉歌二月丁卯司徒平陽王長孫翰薨戊辰車駕還宮三月壬寅進會稽公赫連昌爲秦王夏四月甲子行幸雲中敕勒萬餘落叛走詔尚書封鐵追滅之五月戊

午論討敕勒功大明賞罰秋七月己亥詔諸征鎮將軍王公杖節邊遠者聽開府辟召其次增置吏貳庚子詔大鴻臚卿杜超假節都督異定相三州諸軍事行征南大將軍太宰進爵爲王鎮鄴爲諸軍節度八月宋將到彥之自清水入河泝流西行景寅彥之遣將度河攻冶坂冠軍將軍安頡督諸軍擊破之九月癸卯立密皇太后廟于鄴甲辰行幸統萬遂征平涼是月馮跋死冬十月乙卯冠軍將軍安頡濟河攻洛陽景子拔之辛巳安頡平武牢十一月乙酉車駕至平涼己亥行幸安定庚子帝自安西還臨平涼遂掘塹圍守之行幸紐城安慰初附赦秦隴之人賜復七

年辛酉安頡帥諸軍攻滑臺沮渠蒙遜遣使朝貢壬寅封  
壽光侯叔孫建爲丹楊王十二月丁卯赫連定弟社于度  
洛孤面縛出降平涼收其珍寶定長安臨晉武功守將皆  
奔走關中平壬申車駕還東留巴東公延普等鎮安定

四年春正月壬午車駕次木根山大饗羣臣景申宋將檀  
道濟王仲德從清水救滑臺丹楊王叔孫建汝陰公長孫  
道生拒之道濟等不敢進是月赫連定滅乞伏慕末二月  
辛酉安頡司馬楚之平滑臺癸酉車駕還宮飲至策勲告  
于宗廟賜留臺百官各有差戰士賜復十年定州人飢詔  
開倉以振之宋將檀道濟王仲德東走三月庚戌冠軍將

軍安頡獻宋俘萬餘人甲兵三萬夏六月赫連定北襲沮  
渠蒙遜爲吐谷渾慕瓚所執閏月乙未蠕蠕國遣使朝貢  
詔散騎侍郎周紹使于宋秋七月己酉行幸河西起承華  
宮八月乙酉沮渠蒙遜遣子安周入侍吐谷渾慕瓚遣使  
奉表請送赫連定己丑以慕瓚爲大將軍封西秦王九月  
癸丑車駕還宮庚申加太尉長孫嵩柱國大將軍以左光  
祿大夫崔浩爲司徒征西大將軍長孫道生爲司空癸亥  
詔兼太常李順持節拜西河王沮渠蒙遜爲假節加侍中  
都督涼州持節及西域羌戎諸軍事行征西大將軍太傅  
涼州牧涼王壬申詔曰范陽盧玄博陵崔綽趙郡李靈河

間邢穎勃海高允廣平游雅太原張偉等皆賢雋之胄冠  
冕州邦有羽儀之用易曰我有好爵吾與爾縻之如玄之  
比隱跡衡門不曜名譽者盡敕州郡以禮發遣遂徵玄等  
州郡所遣至者數百人皆差次敘用冬十月戊寅詔司徒  
崔浩改定律令行幸漠南十一月景辰北部敕勒莫弗庫  
若干率其部數萬騎驅鹿獸數百萬詣行在所帝因而大  
狩以賜從者勒石漠南以記功德宜城王奚斤坐事降爵  
爲公十二月車駕還宮

延和元年春正月景午尊保太后爲皇太后立皇后赫連  
氏以皇子晃爲皇太子謁于太廟大赦改元三月丁未追



贈夫人賀氏爲皇后壬申西秦王吐谷渾慕瓚送赫連定於京師夏五月宋人來聘六月庚寅車駕伐和龍詔尚書左僕射安原等屯于漠南以備蠕蠕辛卯詔兼散騎常侍鄧穎使於宋秋七月己巳車駕至和龍穿澗以守之是月築東宮九月乙卯車駕西還徙營丘成周遼東樂浪帶方玄菟六郡人三萬家于幽州開倉以振之冬十月吐谷渾慕瓚遣使朝貢十一月己巳車駕至自和龍十二月己丑馮弼子長樂公崇及其母弟劼弟邈以遼西內屬先是辟召賢良而州郡多逼遣之詔以禮申喻任其進退

二年春二月庚午詔兼鴻臚卿李繼持節假馮崇車騎大

將軍遼西王承制聽置尚書己下壬午詔兼散騎常侍宋  
宣使於宋夏四月沮渠蒙遜死以其子牧犍爲車騎將軍  
改封西河王六月遣永昌王健尚書左僕射安原督諸軍  
討和龍辛巳詔樂安王範發秦雍兵一萬築小城於長安  
城內秋八月遼西王馮崇上表求說降其父帝不聽九月  
宋人來聘并獻馴象一戊午詔兼大鴻臚卿崔躋持節拜  
征虜將軍楊難當爲征南大將軍儀同三司封南秦王冬  
十二月己巳大赦天下辛未幸陰山北詔兼散騎常侍盧  
玄使於宋

三年春正月乙未車駕次于女水大饗羣臣戊戌馮弘遣

使求和帝不許景辰南秦王楊難當尅漢中送雍州流人  
七千家于長安二月戊寅詔以頻年屢征有事西北運輸  
之役百姓勤勞令郡縣括貧富以爲三級富者租賦如常  
中者復二年下窮者復三年辛卯車駕還宮三月甲寅行  
幸河西閏月甲戌秦王赫連昌叛走景子河西侯將格殺  
之驗其謀反羣弟皆伏誅己卯車駕還宮進彭城公粟爵  
爲王秋七月辛巳東宮成備置屯衛三分西宮之一壬午  
行幸美稷遂至隰城命諸軍討山胡白龍于河西九月戊  
子剋之斬白龍及其將帥屠其城冬十一月車駕還宮十  
二月甲辰行幸雲中

太延元年春正月乙未朔日有蝕之壬午降死罪刑已下  
各一等癸未出道武明元宮人令得嫁甲申大赦改元二  
月庚子蠕蠕焉耆車師各遣使朝貢詔長安及平涼人徙  
在京師其孤老不能自存者聽還鄉里丁未車駕還宮夏  
五月庚申進宜都公穆壽為宜都王汝陰公長孫道生為  
上黨王宜城公奚斤為恒農王廣陵公婁伏連為廣陵王  
遣使者二十輩使西域甲戌行幸雲中六月甲午詔曰去  
春小旱東作不茂憂勤剋己祈請靈祇豈朕精誠有感何  
報應之速雲雨震灑流澤霑渥有鄙婦人持方寸玉印詣  
潞縣侯孫家既而亡去莫知所在印有二字為龍鳥之形

要妙奇巧不類人迹文曰旱疫平推尋其理蓋神靈之報  
應也比者以來禎瑞仍臻甘露流液降於殿內嘉瓜合蒂  
生于中山野木連理殖於魏郡在先后載誕之鄉白鷺集  
千盛樂舊都玄鳥隨之蓋有千數嘉禾頻歲合秀於恒農  
白兔並見於勃海白雉三隻又集於平陽太祖之廟天降  
嘉貺將何德以酬之其令天下大酺五日禮報百神守宰  
祭界內名山大川上答天意景午高麗鄯善國並遣使朝  
貢秋七月田於柤陽己卯樂平王丕等五將東伐至和龍  
徙男女六千口而還八月景戌行幸河西粟特國遣使朝  
貢九月車駕還宮冬十月癸卯尚書左僕射安原謀反伏

誅甲辰行幸定州次于新城宮十一月己巳校獵于廣州  
景子行幸鄴祀密太后廟諸所過親問高年褻禮賢俊十  
二月癸卯遣使者以太牢祀北岳

二年春正月甲寅車駕還宮二月戊子馮弘遣使朝貢求  
送侍子帝不許壬辰遣使者十餘輩詣高麗東夷諸國詔  
喻之三月景辰宋人來聘辛未遣平東將軍娥清安西將  
軍古弼討馮弘弘求救於高麗高麗遣其大將葛莫盧迎  
之夏四月甲寅皇子小兒苗兒並薨五月乙卯馮弘奔高  
麗戊午詔散騎常侍封撥使高麗徵送馮弘丁卯行幸河  
西赫連定之西也楊難當竊據上邽秋七月庚戌命樂平

王丕等討之詔散騎常侍游雅使於宋八月丁亥遣使六  
輩使西域帝校獵于河西詔廣平公張黎發定州七郡一  
萬二千人通莎泉道甲辰高車國遣使朝貢九月庚戌樂  
平王丕等至略陽公難當奉詔攝上邽守高麗不送馮弘  
帝將伐之納樂平王丕計而止冬十一月己酉幸柁陽驅  
野馬於雲中置野馬苑閏月壬子車駕還宮乙丑改封潁  
川王提爲武昌王河西王沮渠牧犍遣使朝貢是歲吐谷  
渾慕瓚死

三年春正月癸未中山王纂薨薨子太尉北平王長孫嵩  
薨乙巳丹楊王叔孫建薨二月乙卯行幸幽州存恤孤老

問人疾苦還幸上谷遂至代所過復田租之半三月己卯  
車駕還宮丁酉宋人來聘夏五月己丑詔天下吏人得舉  
告守令不如法者景申行幸雲中秋七月戊子使永昌王  
健上黨王長孫道生討山胡白龍餘黨於西河滅之八月  
甲辰行幸河西九月甲申車駕還宮丁丑遣使者拜西秦  
王慕瓚弟慕利延爲鎮西大將軍儀同三司改封西平王  
冬十月癸卯行幸雲中十一月壬申車駕還宮是歲河西  
王沮渠牧犍世子封壇來朝高麗契丹龜茲悅般焉耆車  
師粟特疏勒烏孫渴盤陀鄯善破洛者古等國各遣使朝  
貢



四年春三月庚辰鄯善王弟素延耆耆來朝癸未罷沙門年五十以下江陽王根薨是月高麗殺馮弘夏五月戊寅大赦秋七月壬申車駕北伐冬十一月丁卯朔日有蝕之十二月車駕至自北伐上洛巴泉輩等相帥內附詔兼散騎常侍高雅使于宋

五年春正月庚寅行幸定州三月辛未車駕還宮庚寅以故南秦王世子楊保宗爲征南大將軍秦州牧武都王鎮上邽夏五月癸未遮逸國獻汗血馬六月甲辰車駕西討沮渠牧犍侍中宜都王穆壽輔皇太子決留臺事大將軍長樂王稚敬輔國大將軍建寧王崇二萬人屯漠南以備

蠕蠕秋七月己巳車駕至上都屬國城大饗羣臣講武馬  
射壬午留輜重分部諸軍八月景申車駕至姑臧牧犍兄  
子祖踰城來降乃分軍圍之九月景戌牧犍與左右文武  
五千人面縛軍門帝解其縛待以藩臣之禮收其城內戶  
口二十餘萬倉庫珍寶不可稱計進張掖公禿髮保周爵  
爲王與龍驤將軍穆羆安遠將軍源賀分略諸郡牧犍弟  
張掖太守宜得西奔酒泉太守無諱後奔晉昌樂都太守  
安周南奔吐谷渾戊子蠕蠕犯塞遂至七介山京都大駭  
皇太子命上黨王長孫道生等拒之冬十月辛酉車駕還  
宮徙涼州人三萬餘家于京師留樂平王丕征西將軍賀

多羅鎮涼州癸亥遣張掖王禿髮保周喻諸部鮮卑保周  
因率諸部叛於張掖十一月乙巳宋人來聘并獻馴象一  
十二月壬午車駕至自西伐飲至策勲告于宗廟楊難當  
寇上邽鎮將元勿頭討走之是歲鄯善龜茲踈勒焉耆高  
麗粟特渴盤陀破郝悉半居等國並遣使朝貢

太平真君元年春正月己酉沮渠無諱圍酒泉辛亥分遣  
侍臣巡行州郡觀察風俗問人疾苦二月己巳詔假通直  
常侍邢穎使於宋發長安人五千浚昆明池三月酒泉陷  
夏四月戊午朔日有蝕之庚辰沮渠無諱寇張掖禿髮保  
周弒刪丹六月丁丑皇孫濬生大赦改元秋七月行幸陰

山己丑永昌王建大破禿髮保周走之景申保太后竇氏  
崩于行宮癸丑保周自殺傳首京師八月甲申沮渠無諱  
降九月壬寅車駕還宮是歲州鎮十五飢詔開倉振恤之  
以河南王曜子羯兒爲河間王後改封略陽王

二年春正月癸卯拜沮渠無諱爲征西大將軍涼州牧酒  
泉王三月辛卯葬惠太后於崑山庚戌新興王俊略陽王  
羯兒有罪黜爲公辛亥封蠕蠕郁久間乞歸爲朔方王沮  
渠萬年爲張掖王夏四月丁巳宋人來聘秋八月辛亥詔  
散騎侍郎張偉使于宋九月戊戌永昌王健薨冬十一月  
庚子鎮南大將軍奚眷平酒泉十二月景子宋人來聘

三年春正月甲申帝至道壇親受符籙備法駕旗幟盡青  
三月壬寅北平王長孫頽有罪削爵爲侯夏四月酒泉王  
沮渠無諱走渡流沙據鄯善涼武昭王孫李寶據敦煌遣  
使內附五月行幸陰山北六月景戌楊難當朝於行宮先  
是起殿於陰山北殿成而難當至因曰廣德焉秋八月甲  
戌晦日有蝕之冬十月己卯封皇子伏羅爲晉王翰爲秦  
王譚爲燕王建爲楚王余爲吳王十二月辛巳太保襄城  
公盧魯元薨丁酉車駕還宮李寶遣使朝貢以寶爲鎮西  
大將軍開府儀同三司沙州牧敦煌公

四年春正月庚午行幸中山二月景子次于恒山之陽詔

有司刊石勒銘是月剋仇池三月庚申車駕還宮夏四月  
武都王楊保宗謀反諸將禽送京師氏羌復推保宗弟文  
德爲主圍仇池六月庚寅詔復人貲賦三年其田租歲輸  
如常牧守不得妄有徵發癸巳大閱于西郊九月辛丑行  
幸漠南甲辰捨輜重以輕騎龍螭蠕分軍爲四道冬十一  
月甲子車駕還至朔方詔曰夫陰陽有往復四時有代謝  
授子任賢蓋古今不易之令典也其令皇太子副理萬機  
摠統百揆諸功臣勤勞日久皆當以爵歸第隨時朝請饗  
宴朕前論道陳謨而已不宜復煩以劇職更舉賢俊以備  
百官明爲科制以稱朕心十二月辛卯車駕至自北伐

五年春正月壬寅皇太子始揔百揆侍中中書監宜都王  
穆壽司徒東都公崔浩侍中廣平公張黎侍中建興公古  
弼輔太子以決庶政諸上書者皆稱臣上疏儀與表同戊  
申詔自王公已下至於庶人私養沙門巫及金銀工巧之  
人在其家者皆遣詣官曹限今年二月十五日過期不出  
巫沙門身死主人門誅庚戌詔自三公已下至於卿士其  
子息皆詣太學其百工伎巧騶卒子息當習其父兄所業  
不聽私立學校違者師身死主人門誅二月辛未中山王  
辰等八人以北伐後期斬于都南癸酉樂平王丕薨庚辰  
行幸廬三月戊辰大會于鄴南遣使者四輩使西域甲辰

車駕還宮夏四月乙亥太宰陽平王杜超爲帳下所殺五月丁酉行幸陰山北六月西平王吐谷渾慕利延殺其兄子緯代立緯弟叱力延等來奔乞師以叱力延爲歸義王秋八月乙丑田于河西壬午詔負外散騎常侍高濟使於宋九月帝自河西至于馬邑觀于崞川己亥車騎還宮丁未行幸漠南冬十月癸未晉王伏羅大破慕利延慕利延走奔白蘭其部一萬三千內附十一月宋人來聘十二月景戌車駕還宮

六年春正月辛亥行幸定州引見長老存問之詔兼負外散騎常侍宋愔使于宋二月遂西幸上黨觀連理樹於玄



氏至吐京討徙叛胡出配郡縣三月庚申車駕還宮詔諸  
有疑獄皆付中書以經義量決夏六月戊子朔日有蝕之  
壬辰北巡秋八月壬辰散騎常侍成周公萬度歸以輕騎  
至鄯善執其王真達與詣京師帝大悅厚待之車駕幸陰  
山北次于廣德宮詔發天下兵三取一各當戒嚴以須後  
命徙諸種雜人五千餘家於北邊令人北徙畜牧至廣漠  
以餌蠕蠕壬寅征西大將軍高涼王邠等討吐谷渾慕利  
延軍到曼頭城慕利延驅其部落西度流沙邠急追故西  
秦王慕瓚世子被囊逆軍拒戰邠擊破之中山公杜豔追  
度三危至雪山禽被囊及慕利延元子什歸熾盤子成龍

送于京師募利延遂西入于闐國九月盧水胡蓋吳聚衆反於杏城冬十一月高涼王邠振旅還京師庚申遼東王竇漏頭薨河東蜀薛永宗聚黨入汾曲西通蓋吳受其位號蓋吳自號天台王署百官辛未車駕還宮選六州兵勇猛者使永昌王仁高涼王邠分領爲一道南略淮泗以北徙青徐之人以實河北癸未西巡

七年春正月戊辰車駕次東雍禽薛永宗斬之其男女無少長皆赴水死辛未南幸汾陰蓋吳退走北地二月景戌幸長安存問父老丁亥幸昆明池遂田于岐山之陽所過誅與蓋吳通謀反害守將者三月詔諸州坑沙門毀諸佛

像徙長安城內工巧二千家於京師夏四月甲申車駕至  
自長安戊子毀鄴城五層佛圖於泥像中得玉璽二其文  
皆曰受命於天既壽永昌其一刻其旁曰魏所受漢傳國  
璽五月蓋吳復聚杏城自號秦地王景戌發司幽定冀四  
州十萬人築畿上塞圍起上谷西至于河廣袤皆千里六  
月癸未朔日有蝕之秋八月蓋吳爲其下人所殺傳首京  
師復略陽公羯兒王爵

八年春正月癸未行幸中山三月河西王沮渠牧犍謀反  
伏誅夏五月車駕還宮六月西征諸將扶風公處真等八  
將坐盜沒軍資所在虜掠賊各千萬計並斬之秋八月樂

安王範薨冬十一月侍中中書監宜都王穆壽薨十二月  
晉王伏羅薨

九年春正月宋人來聘二月癸卯行幸定州山東人飢詔  
開倉振之罷塞圍作遂西幸上黨詔於壺關東北大王山  
累石爲三封又斬其鳳皇山南足以斷之三月車駕還宮  
夏五月甲戌以交趾公韓拔爲假征西將軍領護西戎校  
尉鄒善王鎮鄒善賦役其人比之郡縣六月辛酉行幸廣  
德宮丁卯悅般國遣使求與王師俱討蠕蠕帝許之秋八  
月詔中外諸軍戒嚴九月乙酉練兵于西郊景戌幸陰山  
是月成周公萬度歸千里驛上大破焉耆國其王鳩尸卑

邠奔龜茲冬十月辛丑恒農王奚斤薨癸卯以婚姻奢靡喪葬過度詔有司更爲科限癸亥大赦十二月詔成周公萬度歸自焉耆西討龜茲皇太子朝于行宮遂從北討至受降城不見蠕蠕因積糧城內留守而還北平王長孫敦坐事降爵爲公

十年春正月戊辰朔帝在漠南大饗百寮甲戌蠕蠕吐賀真懼遠遁三月蒐于河西庚寅車駕還宮夏四月景申朔日有蝕之九月閱武於磧上遂北伐冬十月庚子皇太子及羣官奉迎於行宮十二月戊申車駕至自北伐己酉以平昌公託真爲中山王

十一年春正月乙丑行幸洛陽所過郡國皆親對高年存恤孤寡二月甲午大蒐於梁川皇子真薨是月大修宮室皇太子居于北宮車駕遂征縣瓠夏四月癸卯車駕還宮賜從者及留臺郎吏已上生口各有老六月己亥誅司徒崔浩辛丑北巡陰山秋七月宋將王玄謨攻滑臺八月辛亥田于河西癸未練兵於西郊九月辛卯車駕南伐癸巳皇太子北伐屯于漠南吳王余留守京都庾子曲赦定冀相三州死罪已下冬十月乙丑車駕濟河玄謨棄軍而走乃命諸將分道並進車駕自中道十一月辛卯至鄒山使使者以太牢祀孔子是月額眉國獻師子一十二月丁卯

車駕至淮詔刈藿葦作筏數萬而濟淮南皆降癸未車駕臨江起行宮於瓜步山諸軍同日皆臨江所過城邑莫不望塵奔潰其降附者不可勝數甲申宋文帝使獻百牢貢其方物又請進女於皇孫以求和好帝以師婚非禮許而不許婚使散騎侍郎夏侯野報之帝詔皇孫爲書致馬通問焉

正平元年春正月景戌朔大會羣臣於江上文武受爵者二百餘人丁亥車駕北旋二月癸未次于魯口皇太子朝於行宮三月己亥車駕至自南伐飲至策勲告於宗廟以降人五萬餘家分置近畿賜留臺文武所獲軍資生口各

有羌夏五月壬寅大赦六月壬戌改元車師國王遣子入  
侍詔以刑網太密犯者更衆命有司其案律令務求厥中  
自餘有不便於人者依比增損詔太子少傅游雅中書侍  
郎胡方回等改定律制略陽王羯兒高涼王郗有罪賜死  
戊辰皇太子薨壬申葬景穆太子於金陵秋七月丁亥行  
幸陰山省諸曹吏貲三分之一九月癸巳車駕還宮冬十  
月庚申行幸陰山宋人來聘詔殿中將軍郎法祐使於宋  
己巳司空上黨王長孫道生薨十二月丁丑車駕還宮封  
皇孫濬爲高陽王尋以皇孫世嫡不宜在藩乃止改封秦  
王翰爲東平王燕王譚爲臨淮王楚王建爲廣陽王吳王



余爲南安王

二年春正月庚辰朔南來降人五千餘家於中山謀叛州軍討平之冀州刺史張掖王沮渠萬年與降人通謀賜死三月甲寅中常侍宗愛構逆帝崩於永安宮時年四十五祕不發喪愛又矯皇后令殺東平王翰迎南安王余立大赦改元爲承平尊謚曰太武皇帝葬於雲中金陵廟號世祖帝生不逮密太后及有所識言則悲慟哀感傍人明元聞而嘉歎及明元不豫衣不釋帶性清儉率素服御飲膳取給而已不好珍麗食不二味所幸昭儀貴人衣無兼絲羣臣白帝更峻京邑城隍以從周易設險之義又陳蕭何

壯麗之說帝曰古人有言在德不在險屈丐蒸土築城而  
朕滅之豈在城也今天下未平方須人力土功之事朕所  
未爲蕭何之對非雅言也每以財者軍國之本無所輕費  
至於賞賜皆是勲績之家親戚愛寵未嘗權有所及臨敵  
常與士卒同在矢石閒左右死傷者相繼而帝神色自若  
是以人思效命所向無前命將出師指授節度從命者無  
不制勝違爽者率多敗失性又知人拔士於卒伍之中唯  
其才效所長不論本末兼甚嚴斷明於刑賞功者賞不遺  
賤罪者刑不避親雖寵愛之終不虧法常曰法者朕與天  
下共之何敢輕也故大臣犯法無所寬假雅長聽察瞬息

之閒下無以措其姦姦隱然果於誅戮後多悔之司徒崔浩  
死後帝北伐時宣城公李孝伯疾篤傳者以爲卒帝聞而  
悼之謂左右曰李宣城可惜又曰朕向失言崔司徒可惜  
李宣城可哀褒貶雅意皆此類也

景穆皇帝諱晃太武皇帝之長子也母曰賀夫人延和元  
年正月景午立爲皇太子時年五歲明慧強識聞則不忘  
及長好讀經史皆通大義太武甚奇之及西征涼州皇太  
子監國初太武之伐河西李順等咸言姑臧無水草不可  
行師太子有疑色及車駕至姑臧乃詔太子曰姑臧城東  
西門外涌泉合於城北其大如河澤草茂盛可供大軍數

年人之多言亦可惡也太子謂宮臣曰爲人臣不實若此  
豈是忠乎吾初聞有疑但帝決行耳幾誤人大事言者復  
何面目見帝也真君四年從征蠕蠕至鹿渾谷與賊遇虜  
惶怖擾亂太子言於太武曰宜速進擊掩其不備中書令  
劉潔固諫以爲塵盛賊多須軍大集太子曰此由賊恆擾  
何有營上而有此塵太武疑之遂不急擊蠕蠕遠遁旣而  
獲虜候騎乃云不覺官軍卒至上下惶懼北走經六七日  
知無追者乃徐行帝深恨之自是太子所言軍國大事多  
見納用遂知萬機及監國命有司使百姓有牛家以人牛  
相貿又禁飲酒雜戲棄本沽販者於是墾田大增正平元

年六月戊辰薨於東宮時年二十四庚午命持節兼太尉  
張黎兼司空竇瑾奉策即柩謚景穆太子文成即位追尊  
爲景穆皇帝廟號恭宗

高宗文成皇帝諱濬景穆皇帝之長子也母曰閭氏真君  
元年六月生於東宮帝少聰達太武常置左右號世嫡皇  
孫年五歲太武北巡帝從在後逢虜帥桎一奴將加罰帝  
謂曰奴今遭我汝宜釋之帥奉命解縛太武聞之曰此兒  
雖小欲以天子自處意竒之及長風格異常每參決大政  
可否正平二年三月中常侍宗愛弒逆立南安王余十月  
景午朔又賊余於是殿中尚書長孫渴侯與尚書陸麗奉

迎世嫡皇孫

興安元年冬十月戊申皇帝即位於永安前殿大赦改元  
正平二年爲興安以驃騎大將軍元壽樂爲太宰都督中  
外諸軍錄尚書事以尚書長孫渴侯爲尚書令儀同三司  
十一月景子二人爭權並賜死癸未廣陽王建臨淮王譚  
薨甲申皇妣閭氏薨進平南將軍宋子侯周怵爵爲樂陵  
王南部尚書常安子陸麗爲平原王文武各加位一等壬  
寅追尊皇考景穆太子爲景穆皇帝妣閭氏爲恭皇后尊  
保母常氏爲保太后十二月戊申祔葬恭皇后於金陵乙  
卯初復佛法丁巳以樂陵王周怵爲太尉平原王陸麗爲

司徒鎮西將軍杜元寶爲司空保達沙獵等國各遣使朝  
貢戊寅進建業公陸侯爵爲東平王進廣平公杜遺爵爲  
王癸亥詔以營州蝗開倉振恤甲子太尉樂陵王周怱有  
罪賜死進濮陽公問若文爵爲王

二年春正月辛巳進司空杜元寶爵爲京兆王廣平王杜  
遺薨進尚書僕射東安公劉尼爵爲王封建寧王崇子麗  
爲濟南王癸未詔與百姓雜調十五景戌進尚書西平公  
源賀爵爲王二月己未司空京兆王杜元寶謀反伏誅建  
寧王崇崇子濟南王麗爲元寶所引各賜死乙丑發京師  
五千人穿天泉池是月宋太子劭殺文帝三月尊保太后

爲皇太后進安豐公閭武皮爵爲河間王夏五月宋孝武帝殺太子劭而自立閏月乙亥太皇太后赫連氏崩秋七月辛亥行幸陰山濮陽王閭若文永昌王仁謀反乙卯仁賜死若文伏誅己巳車駕還宮是月築馬射臺於南郊八月戊戌詔曰朕即位以來風雨順序邊方無事衆瑞兼呈又於苑內獲方寸玉印其文曰子孫長壽羣公卿士咸曰休哉豈朕一人克臻斯應寔由天地祖宗降祐之所致也思與兆庶共茲嘉慶其令百姓大酺三日降殊死已下囚九月壬子閱武於南郊冬十一月辛酉行幸信都中山觀察風俗十二月甲午車駕還宮復北平公長孫敦王爵是



歲踈勒渴盤陀庫莫奚契丹剌賓等國各遣使朝貢

興光元年春正月乙丑以侍中河南公伊弼為司空二月  
甲午帝至道壇登受圖籙禮畢曲赦京師夏六月行幸陰  
山秋七月景申朔日有蝕之庚子皇子弘生辛丑大赦改  
元八月甲戌趙王深薨乙亥車駕還宮乙丑皇叔武頭龍  
頭薨九月庫莫奚國獻名馬有一角狀如麟閉都門大索  
三日獲姦人亡命數百人冬十一月戊戌行幸中山遂幸  
信都十二月景子還幸靈丘至溫泉宮庚辰車駕還宮出  
于叱萬單等國各遣使朝貢

太安元年春正月辛酉奉太武景穆神主于太廟樂平王

拔有罪賜死二月癸未武昌王提薨三月己亥以太武景  
穆神主入太廟改元曲赦京師死囚已下夏六月壬戌詔  
名皇子弼曲赦癸酉詔尚書穆真等二十人巡行州郡觀  
察風俗大明賞罰冬十月庚午以遼西公常英為太宰進  
爵為王是歲遮逸波斯踈勒等國各遣使朝貢

二年春正月乙卯立皇后馮氏二月丁巳立皇子弼為皇  
太子大赦夏六月羽林中郎于判元提等謀逆誅秋八月  
田於河西平西將軍漁陽公尉眷北擊伊吾剋其城大獲  
而還九月辛巳進河東公閭毗零陵公閭紇爵並為王冬  
十月甲申車駕還宮甲午曲赦京師十一月改封西平王

源賀隴西王噶達普嵐等國各遣使朝貢

三年春正月徵漁陽公尉眷拜太尉進爵爲王錄尚書事  
夏五月封皇弟新成爲陽平王六月癸卯行幸陰山秋八  
月田於陰山之北己亥還宮冬十月將東巡詔太宰常英  
起行宮於遼西黃山十二月州鎮五蝗百姓飢使開倉振  
給之是歲粟特于闐等五十餘國並遣使朝貢

四年春正月景午朔初設酒禁乙卯行幸廣寧溫泉宮遂  
東巡庚午至遼西黃山宮遊宴數日親對高年勞問疾苦  
二月景子登碣石山觀滄海大饗羣臣於山上班賞進爵  
各有差改碣石山爲樂遊山築壇記行於海濱戊寅南幸

信都田於廣川三月丁未觀馬射於中山所過郡國賜復  
一年景辰車駕還宮起太華殿乙丑東平王陸侯薨夏五  
月壬戌詔曰比年以來雜調減省而所在州郡咸有逋懸  
非在職之官綏導失所貪穢過度誰使之然自今常調不  
充人不安業宰人之徒加以死罪六月景申田於松山秋  
七月庚午行幸河西九月丁巳還宮辛亥太華殿成景寅  
饗羣臣大赦冬十月甲戌北巡至陰山有故冢毀廢詔曰  
昔姬文葬枯骨天下歸仁自今有穿墳壠者斬之辛卯次  
于車輪山累石記行十一月車駕渡漠蠕蠕絕迹遠遁十  
二月中山王託真薨

五年春二月己酉司空河南公伊穢薨三月庚寅曲赦京  
師死罪已下夏四月乙巳封皇弟子推為京兆王五月常  
居國遣使朝貢六月戊申行幸陰山秋八月庚戌遂幸雲  
中壬戌還宮九月戊辰儀同三司敦煌公李寶薨冬十二  
月戊申詔以六鎮雲中高平二雍秦州徧遇災旱年穀不  
收開倉廩振之有徙流者喻還桑梓

和平元年春正月甲子朔大赦改元庚午詔散騎侍郎馮  
闡使於宋夏四月戊戌皇太后常氏崩於壽安宮五月癸  
酉葬昭太后於廣寧鳴雞山六月甲午詔征西大將軍陽  
平王新城等討吐谷渾什寅崔浩之誅也史官遂廢至是

復置秋七月西征諸軍至西平什寅走保南山九月庚申朔日有蝕之是月諸軍濟河追什寅遇瘴氣多病疫乃引還庚午車駕還宮冬十月居常王獻馴象三十一月詔散騎侍郎盧度世使於宋

二年春正月乙酉詔曰刺史牧人爲萬里之表自頃每因發調逼人假貸大商富賈要射時利上下通同分以潤屋爲政之弊莫過於此其一切禁絕犯者十疋以上皆死布告天下咸令知禁二月行幸中山遂幸信都三月宋人來聘車駕所過皆親對高年問疾苦詔年八十一子不從役靈丘南有山高四百餘丈乃詔羣臣仰射山峯無能踰者

帝彎弧發矢出三十餘丈過山南二百一十步遂刊石勒  
銘是月發并肆州五千餘人修河西獵道辛巳車駕還宮  
夏四月乙未河東正閭毗薨五月癸未詔南部尚書黃盧  
頭李敷業考課諸州秋七月戊寅封皇弟小新成爲濟陰  
王天賜爲汝陰王萬壽爲樂良王洛侯爲廣平王八月波  
斯國遣使朝貢冬十月詔假員外散騎常侍游明根使于  
宋廣平王洛侯薨

三年春正月壬午以東郡公乙渾爲太原王癸未樂良王  
萬壽薨二月壬子朔日有蝕之癸酉田於崑山遂觀漁于  
旋鴻池三月甲申宋人來聘高麗薨王契嚙思厭於師䟽

勒石那悉居半渴盤陀等國並遣使朝貢夏六月庚申行幸陰山秋七月壬寅幸河西九月壬辰常山王素薨冬十月詔負外散騎常侍游明根使于宋十一月壬寅車駕還宮十二月乙卯制戰陣之法十有餘條因大儺曜兵有飛龍騰虵魚麗之變以示威武戊午零陵王問拔薨

四年春三月乙未賜京師人年七十以上太官厨食以終其年皇子胡仁薨追封樂陵王夏四月癸亥上幸西苑親射猛獸三頭五月壬辰侍中漁陽王尉眷薨壬寅行幸陰山秋七月壬午詔曰朕每歲閑月命羣臣講武所幸之處必立宮壇糜費之功勞損非一宜仍舊貫何必改作也八



月景寅遂田于河西九月辛巳車駕還宮冬十月以定相  
二州霜傷稼免其田租詔貢外散騎常侍游明根使於  
宋十二月辛丑詔以喪葬嫁娶大禮未備命有司爲之條  
格使貴賤有章上下咸序著之于令壬寅詔曰婚姻者人  
道之始比者以來貴族之門多不率法或貪利財賂或因  
緣私好在於苟合無所擇選塵穢清化虧損人倫將何以  
宣示典謨垂之來襲令制皇族肺腑王公侯伯及士庶之  
家不得與百工伎巧卑姓爲婚犯者加罪

五年春正月丁亥封皇弟雲爲任城王二月詔以州鎮十  
四去歲蟲水開倉振恤夏四月癸卯進封頓丘公李峻爲

王閏月戊子帝以旱故減膳責身是夜澍雨大降五月宋  
孝武帝殂六月丁亥行幸陰山秋七月壬寅行幸河西九  
月辛丑車駕還宮冬十月琅邪侯司馬楚之薨十二月南  
秦王楊難當薨吐呼羅國遣使朝貢

六年春正月景中大赦二月丁丑行幸樓煩宮高麗王  
對曼等國各遣使朝貢三月戊戌相州刺史西平郡王吐  
谷渾權薨乙巳車駕還宮夏四月破洛那國獻汗血馬普  
嵐國獻寶劔五月癸卯帝崩于太華殿時年二十六六月  
景寅奉尊謚曰文成皇帝廟號高宗八月葬雲中之金陵  
顯祖獻文皇帝諱弘文成皇帝之長子也母曰李貴人興

光元年七月生於陰山之北太安二年二月立爲皇太子  
和平六年五月甲辰即皇帝位大赦尊皇后曰皇太后車  
騎大將軍乙渾矯詔殺尚書楊保年平陽公賈愛仁南陽  
公張天度于禁中戊申司徒公平原王陸麗自湯泉入朝  
又殺之己酉以渾爲太尉公以錄尚書事東安王劉尼爲  
司徒公以尚書左僕射和其奴爲司空公六月封繁陽侯  
李疑爲丹楊王征東大將軍馮熙爲昌黎王秋七月癸巳  
以太尉乙渾爲丞相位居諸王上事無大小皆決焉九月  
庚子曲赦京師丙午詔曰先朝以州牧親人宜置良佐故  
敕有司班九條之制使前政選吏以待後人然牧司舉非

其人憊于典度今制刺史守宰到官之日仰自舉人望忠  
信以爲選官不論前政共相平置若簡任失所以罔上論  
是月宋義陽王劉昶自彭城來奔冬十月徵陽平王新成  
京兆王子推濟陰王小新成汝陰王天賜任城王雲入朝  
十一月宋湘東王或殺其主子業而自立

天安元年春正月己丑朔大赦改元二月庚申丞相太原  
王乙渾謀反伏誅乙亥以侍中元孔雀爲濮陽王侍中陸  
定國爲東郡王三月庚子以隴西王源賀爲太尉公辛丑  
高宗文成皇帝神主祔于太廟辛亥帝幸道壇親受符籙  
曲赦京師秋九月己酉初立鄉學郡置博士二人助教二

人學生六十人冬十二月皇弟安平王薨是歲州鎮十一  
旱人飢開倉振恤

皇興元年春正月癸巳鎮南大將軍尉元大破宋將張永  
沈攸之於呂梁東宋人來聘庚子東平王道符謀反於長  
安其司馬段太陽斬之傳首京師道符兄弟皆伏誅閏月  
以頓丘王李峻爲太宰二月濟陰王小新成薨宋東平太  
守申纂戍無鹽逼絕王使詔征南大將軍慕容白曜督諸  
軍往討三月甲寅剋之秋八月丁酉幸武州山石窟寺戊  
申皇子宏生大赦改元九月己巳進馮翊公李白爲梁郡  
王冬十月己亥朔日有蝕之癸卯田於鄆男池濮陽王孔

崔坐怠慢降爲公

二年春二月癸未田于西山親射武豹三月慕容白曜進  
圍東陽戊午宋人來聘夏四月景子朔日有蝕之辛丑進  
南郡公李惠爵爲王五月乙卯田于崢山遂幸敏衆時辛酉  
車駕還宮六月庚辰以河南關地曲赦京師殊死已下以  
昌黎王馮熙爲太傅秋九月辛亥封皇叔禎爲南安王長  
壽爲城陽王太洛爲章武王休爲安定王冬十月癸酉朔  
日有蝕之辛丑田于冷泉十一月州鎮二十七水旱詔開  
倉振恤十二月甲午詔曰頃張永敢拒王威暴骨原隰天  
下之人一也其永軍殘廢之士聽還江南露骸草莽者赦

州縣收瘞之

三年春正月乙丑東陽潰虜沈文秀戊辰司空平昌公和其奴薨二月己卯進上黨公慕容白曜爵爲濟南王夏四月壬辰宋人來聘景申名皇子宏大赦丁酉田于崢山五月徙青齊人於京師六月辛未立皇子宏爲皇太子冬十月丁酉朔日有蝕之是月太宰頓立王李峻薨十一月進襄城公韓頽爵爲王

四年春正月州鎮大飢詔開倉振恤二月以東郡王陸定國爲司空公詔征西大將軍上黨王長孫觀討吐谷渾什寅廣陽王石侯薨三月景戌詔天下人病者所在官司遣

鑿就家詆視所須藥任鑿所量給之夏四月辛丑大赦戊申長孫觀軍至曼頭山大破什寅五月封皇弟長樂爲建昌王六月宋人來聘秋八月蠕蠕犯塞九月景寅車駕北伐諸將俱會于女水大破虜軍司徒東安公劉尼坐事免壬申車駕至自北伐飲至策勲告于宗廟冬十月誅濟南王慕容白曜高平公李敷十一月詔弛山澤禁十二月甲辰幸鹿野苑石窟寺陽平王新成薨

五年春二月乙亥詔假負外散騎常侍邢祐使于宋夏四月北平王長孫敷薨六月丁未行幸河西秋七月景寅遂至陰山八月丁亥車駕還宮帝幼而神武聰睿機悟有濟



人之規仁孝純至禮敬師友及即位雅薄時務常有遺世之心欲禪位於叔父京兆王子推羣臣固請乃止景午使太保建安王陸馥太尉源賀奉皇帝璽綬冊命皇太子升帝位於是羣公奏上尊號太上皇帝己酉太上皇帝徙御崇光宮采椽不斲土階而已國之大事咸以聞承明元年文明太后有憾帝崩於永安殿年二十三上尊謚曰獻文皇帝廟號顯祖葬雲中金陵

論曰太武聰明雄斷威靈傑立藉二世之資奮征伐之氣遂戎軒四出周旋夷險平秦隴掃統萬翦遼海蕩河源南夷荷擔北蠕絕迹廓定四表混一華戎其爲武功也大矣

遂使有魏之業光邁百王豈非神叡經綸事當命世至於  
初則東儲不終末乃豐成所忽固本貽防殆弗思乎景穆  
明德令聞夙世殂夭其戾園之悼歟文成屬太武之後內  
頗虛耗旣而國豐時艱朝野楚楚帝與時消息靜以鎮之  
養威布德懷緝中外自非機悟深裕矜濟爲心亦何能若  
此可謂有君人之度矣獻文聰叡夙成兼資雄斷故能更  
清漠野大啓南服而早有厭世之心終致宮闈之變將天  
意也

魏本紀第二

北史二

周 已千 孫 粹然 校正

